

雪橋詩話餘集



雪橋詩話餘集卷第四

遼陽楊鍾義撰集

吳興劉承幹參校

世宗藩邸在皇城東北登極後命名曰雍和宮圓明園在挂甲屯之北距暢春園里許爲潛邸賜園之名圓明園長春仙館則高宗爲皇子時賜居地後以迎奉

孝聖憲皇后爲膳寢之所者也高宗爲皇子所居卽

今之重華宮宮前爲崇政殿卽樂善堂東廡爲古香齋西廡曰抑齋卽位後凡園亭行館有可靜憩觀書者率以抑齋爲額御製詩有云祇有抑然志庶幾如武公

雍正中 孝恭仁皇后之喪有漢軍佐領李斯琦以二
十七日後鬚髮擬斬監候旋釋之乾隆戊辰錢唐金質
夫知錦州值 孝賢純皇后之喪於二十七日後鬚髮
質夫故翰林素不禮同城旗員於是防禦某訐之於副
都統副都統亦故憾之遂以聞被逮擬大辟袁存齋過
保陽詩江南哀庾信僮耳老東坡白刃餘生健青雲舊
夢多小窗重翦燭大海早揚波莫靳醅醪飲蛟龍脫網
羅爲質夫作也自國初以來遭 帝后之喪惟京官百
日不鬚頭以有百日與祭之禮也外官無論滿漢大小
皆二十七日釋服卽鬚頭至是定制 國恤百日內鬚

頭者立斬載入會典律例當質夫獄上時盛大司寇安
爲左都御史獨不肯署牘諸大臣強之始署及長刑部
召見日言金文滄之鬣頭沿漢人故習耳且先請之上
官而後鬣情可恕 高宗首肯之及欲改擬斬候同官
恐獲罪持不可久之或爲蜚語聞召詰之力援李斯琦
例爲請 上大怒下之獄論斬監候戍其子喀通阿於
熱河披甲同時逮問者南河總督周學健湖廣總督塞
楞額學健尋與質夫同發直隸罰修城工而塞楞額賜
自盡嗣學健以贓私仍下獄賜自盡而湖北巡撫彭樹
葵湖南巡撫楊錫紱以順從總督薄其罪且先請檢舉

免修城

吳敬梓敏軒老伶行贈八十七叟王甯仲云 聖皇峻
德如雲日赤雁歌成白麟出游河巡洛邁唐虞御宇昇
平六十一乘輿六度幸江南貝葉三花華蓋含句陳列
宿湛盧劍陪輦詞人玳瑁簪駐蹕金陵佳麗地舊京憑
弔思明季樂舞雩門祭孝陵行宮夜半喧歌吹中有伶
工最少年歌喉百轉 聖人前幽咽如聞隴頭水嘈切
琵琶四十絃忽然靈威歌天馬行雲自止塵飛下宮女
私驚聲繞梁侍臣共見顏如赭 君王親顧賜纏頭中
使攜來寵渥優幾日鑿輿渡江去從茲鞠部姓名留鞠

部從茲羨榮遇秦青咸黑都相妬下里喧傳郢市歌何
人敢學邯鄲步本朝家法重明良偶爾伶工一擅場新
磨安敢呼天下幡綽焉能侍上皇鼎湖龍去曾偷泣當
日御階看鵠立夢裏猶聞天語呼潦倒梨園自於邑
潦倒梨園五十年蕭蕭白髮暮江邊誅茅自搆三間屋
種秫新營二頃田蒔花插竹時酣酒往事追思重回首
濃綠參差盼帝梧嫩黃搖曳瞻堯柳有時乘興入豪家
忻看綽板閒箏琶不知匿笑緣何事爲道流涎逢麴車
今年城北花朝會鷓鴣拉雜紛無賴四座都爲失意人
老伶闌入歡聲大銀燭重燒眼倍明蹒跚兩足不成行

參軍邦老新裝就緩步氍毹歌一聲一聲歌罷羣稱善
都緣曾侍瑤池宴似從天上謫人閒屈指流年若飛電
我語老伶聲勿吞曾受 君王賜予恩才人多少凌雲
賦白首何曾獻至尊酒闌燭跋笙歌歇行到板橋珍重
別曾見當年歌舞誰秦淮流水鍾山月乾隆初無錫吳
蒙泉官上元廣文與敏軒唱酬爲題老伶行後云崔九
堂前一曲歌落花時節柰君何白頭應記昇平樂廿載
江南望幸多零落才人獻賦遲興酣翻出老伶詩良辰
好貰旗亭酒賭取黃河遠上詞

繆澧南司寇姚亭卽事和鄂宮詹韻云文窗窈窕日初

斜蘚色侵階徑覆莎曾是 先皇巡幸地茅茨不翦露
雲芽月地雲階想像行宮車去後草還生秋花一朶殷
紅色苑樹龍蔥不記名山色溪光清淨身白頭宮監意
相親峰腰指點紅蕤草黃幄中閒坐 聖人嗚咽泉聲
繞曲臺鼎湖龍去有餘哀小臣親灑橋山淚獨抱遺弓
首重回鄂宮詹卽復菴司農爲文端介弟雅頌集祇錄
其 聖武遠揚平定青海詩八首原作不可見矣錢集
齋尙書恭輓 聖祖仁皇帝四首云列宿長環太乙宮
忽驚斗極坼天中九韶搏拊留儀鳳萬國衣冠泣有熊
擊壤不知雲影暗授時忍見日華空一封遺詔傳中外

淚灑冰天率土同繼業功同創業多坐麾貔虎定山河
穴中窮寇俘元濟徼外蠻荒下伏波妖鳥盡時驚玉弩
長鯨翦後止天戈遺弓在抱思神武回首軒臺涕泗沱
蠲租給復主恩深重道崇儒識 聖心雲漢作人文壽
考豆登肇祀 帝居歆更無鴻雁鳴中澤只有鷓鴣羣
上林臣亦湖邊親從者攀髯流動最難禁帝車環指運
無窮父老年年望六龍曾仰翠華瞻舜帝最憐縞素哭
仁宗望祈已咽通神鼓陟降疑聞警夜鐘六十一年寬
大政漢唐奕代總難逢 高宗有御製遙亭行宮
對雨詩姚亭蓋卽遙亭
世宗憲皇帝遺詔云凡各衙門條例有從前本嚴而朕

改易從寬者此從前部臣定議未協朕與廷臣悉心斟酌而後更定以垂永久者也應照更定之例行若從前之例本寬而朕改易從嚴者此乃整飭人心風俗之計原欲暫行於一時俟諸弊革除之後仍可酌復舊章此朕本意也向後遇此等事則再加斟酌若有應照舊例者仍照舊例行錢文端恭輓四首之二云正位當陽日憂勤念八荒商書宜駿厲周禮最精詳天意原仁愛王權有弛張畏神兼服教千載憶軒皇爲足窺見體仁長人之本旨矣

高郵殷樊桐以明經貢太學丁酉京闈名在副車籍天

長曾一出爲吏誠樸不與吏習諧不克久於官生順治
庚子乾隆壬戌尙健在詩如隱峰菴云一半屋依山作
壁兩三僧與佛同龕毘尼菴云小閣一燈當佛面短籬
三尺及人肩同李北岳羅玉行泛舟城南云拍隄野水
碧見底迎面沙禽飛趁人癸酉冬老母誕辰云愁深倚
杖看孤影悔甚生男志四方北固菴云墮地風枝吹老
樹過橋僧影杖枯藜荅李北岳云愁非幾卷書能遣癩
到經旬髮不梳初冬感懷云少睡事從疇昔數善忘書
定再三看喜得南歸云眉占黃色今纔準鏡驗蒼顏月
不同讀史云賦得郊居筆最工官階苦只望儀同坐中

腸斷齊宮伎偏識前朝沈侍中甘泉山下卽目云盤古
祠前落葉多晚風吹處水微波秋槐一路蟬聲寂看戲
野塘雙白鵝卽事云竹屋深深枳樹籬風簾少上有上鉤
時落花黏地燕泥溼筍破綠苔人未知夏氏味堂稱其
寫情狀事冲秀有不盡之旨非鄉黨之阿好也

果毅親王善擘窠大書兼能繪事解州漢漢壽亭侯廟
有所畫侯像吳胥石詩畫圖展縹軸標識自宗潢生面
開千古英風照八荒規模殊慘淡點染入微茫可想見
其能事蔡時豫有次南星店果親王壁上畫松歌

曹諤廷代挽怡親王句云八字褒無忝千秋痛最慙雍

正四年 御書忠誠敬直勤慎廉明八字以賜以八年

五月薨

平敏郡王夙工文翰所善九河考三老五更辨京房考
功課吏論卦圖先後天論可以頡頏濟齋平視敬亭徐
恕齋讀中祕書與有縞紵之契嘗以吳仲圭山水貽恕
齋平邸故後恕齋題三絕句云芳韻泠泠拂澗阿千金
敝帚未爲多寒山枯木渾無恙回首朱門已逝波何限
人琴欲愴神玉魚金椀葬嶙峋梁園賓從風流杳水墨
空留梅道人小樓寒雨暝煙昏讀畫還將逸品論敢忘
零執持贈意酒闌重說信陵恩

慎靖郡王送板橋鄭變爲范縣令云萬丈才華繡不如
銅章新拜五雲書朝廷今得鳴琴牧江漢應閒問字居
四廓桃花春雨後一缸竹葉夜涼初屋梁落月吟瓊樹
驛遞詩筒莫遺疏又題其詩鈔云高人妙義不求解充
腸朽腐同魚蟹此情今古誰復知疏鑿混沌驚眞宰振
枯伐萌陳厥粗浸淫漁畋無不無按拍遙傳月殿曲走
盤亂瀉蛟宮珠十載相知皆道路夜深把卷吟秋屋明
眸不識烏雌雄妄與盲人辨烏鵠果恭親王稱其被服
寒素左右圖書多延接四方之士其紫瓊巖詩鈔爲幕
客顧元揆所定書而列之蓋比於林吉人之書漁洋精

華錄王旣薨無子 高宗命質莊親王爲之後乾隆癸卯質邸哀其餘橐爲續刻焉質邸九思堂詩鈔落花句云婪尾忽驚沈醉後遨頭須趁妙歌前簾疏偶趁繡書過徑僻時留印屐稀沈郎瘦憶梅風韻老可閒參竹性情皆見清疏錢擇石題其畫卷云早聞設有嘉賓醴比想藏多善本書定郡王亦工畫擇石奉題清漣晚汎圖云被服詩書儒者術光明孝友 聖人孫蓋定安親王子也

浙中詩派多宗樊榭山民往往繪圖祀之所著遼史拾遺東城雜記爲汪小米所校刊詩編自甲午與宋詩紀

事版舊藏黃薌泉家貌瘦人呼瘦厲舊居傍南湖自號
南湖花隱移居東城卒年六十二葬於西溪王家隲母
夫人墓之側嘉慶閒阮文達補題墓碑余慈柏諸人鳩
置墓田屬交蘆菴僧春秋致祭吳穀人作墓田記栗主
向供武林門外牙灣黃山谷祠中姬人朱月上主附祀
王述菴撰楹聯云丈室華同天女散摩圍詩共老人參
道光戊子春趙雱門蔡木龕李西齋遷奉栗主於交蘆
菴之塔院中爲先生右則月上胡書農作記一首惟先
生蔣夫人之主不知所在蓋厲氏木主皆被毀先生主
爲丁龍泓書月上主爲先生自書以名筆親題獲存烏

程奚疑子復所居榆蔭樓卽鮑氏溪樓昔年迎月上處
費曉樓繪樊榭遺像以贈子復笠澤王硯農搗贈放翁
小像同弄樓中曉樓暨湯雨生均爲作溪橋延月圖每
歲五月一日先生生辰子復招同人集榆樓爲壽朱朗
齋孫兩人先後輯先生詩譜未成仁和汪弑劍秋嘗擬
注先生詩同治中丁松生重葺交蘆菴何子貞爲書粟
主

南海王清淮布衣潛丙戌春日送馬匯川移居滄州
云昔爲華省客今作苦吟人掃迹干官隊還山百卷新
深杯消世累高唱縱天真惆悵甘泉樹花開誰與春浮

生適意耳是處可爲家相見揚雄宅行看潘岳花鳩啼
梅雨急燕舞柳風斜歸夢隨君去春雲徧水涯垂白耽
文事於君愧不如早蕪諸謝體再逼右軍書誰謂年方
壯飄然賦遂初明堂知有作爲問子雲居鶯花二月暖
宛似洛陽時對酒不能飲明朝空有思卜期心惻惻攬
轡語遲遲莫爲神仙誤山中只看棋匯川初僑寓天津
與滄州劉師退編修果實天津查漢客處士曦交好查
氏藏匯川墨迹最多有橫看書次見訪東園韻二詩跋
謂漢客先生謬題荒野情見乎詞不虛王裴柳市之感
也王清淮詩近孟襄陽不博藍田曲江之賞棲棲不及

襄陽矣惟君憐之清淮之幸也梅樹君稱其書法道逸
鐵畫銀鉤其柬思退先生云海澤蠶耕覺晏如農家亦
自有三餘缺牆密補淇泉竹敗絮閒鈔竺國書豈謂登
龍能繡虎自非緣木強求魚真靈位業原無分烏目仙
人號慧車師退鄉居四十年襟懷夷曠以課後進自給
亦安貧守道之士也

顧小厓少詹世居光福己酉公車寓蔡宗丞嵩京邸嵩
以年黨逮問簿錄其家得小厓哀輓 仁皇帝詩上感

九重不次召見命直上書房賜居澄懷園之花雨山
房踰年會榜後賜進士改翰林游陟侍講有花雨山房

詩文小鈔紀恩遇也當時詞臣每被殊遇黃石牧中允
以辛丑庶常奏中元祭 仁皇帝文稱旨越日召見授
編修充講官尋命提督福建學政甯都盧端臣詹事初
以貢生充武英殿纂修分校經史 詔編律呂正義又
以莊親王薦爲纂修官及官侍讀命擬樂章兼樂部行
走樂部皆部院大臣兼之以五品詞臣廁其間尤爲異
數曹諤廷黃門送小厓同年卽題其易說卷後云五載
皇家傳飄然許遂初不因多疾病那便憶樵漁栗里勤
收芋文園罷著書報恩身健在早晚赴徵車南昌涂石
溪大銀臺雍正癸卯舉人官中書直軍機乾隆己未官

滿當出佐郡旋以一甲弟二人及第充江蘇宣諭化導
使未散館授中允遷侍讀晉學士充講官直上書房再
擢閣學授工部右侍郎釋褐裁兩載尤不次之遭遇也
雍正戊申元宵前二日翰詹諸臣 召試乾清宮各擬
上諭一道不分等次俱蒙賜貂徐階五恭紀詩云傳柑
時節自公餘中旨俄聞下玉除六館詞臣齊橐筆還如
獻策玉階初乾清宮闕日華妍玉砌金鋪香漢連香案
前頭徐染翰都忘身在九重天華鐙兩樹轟丹墀瓔珞
珠旛天半垂向晚燭龍光射斗于枝寶燄簇琉璃琅函
彝鼎列團圞丹地森嚴禮數寬已荷尙方榮給札更煩

中使屢傳餐聖朝民隱燭幽微屬草殊難達萬幾總是
優容叨覆載豐貂一例拜恩輝

乾隆初嘗 召宴大學士及南書房諸臣賦元宵徐階
五詩造蜃良宵獻傳柑節物呈唐時上元日造麪蜃蓋
卽元宵也錢文端句云風團謝家絮霜點洞庭橙戴文
端春紅浮圓云春寒釀雪試燈前庭樹無花罨晚煙譬
見小紅浮似玉晶球應讓十分圓小名擬共侍兒呼唐
突西家製絕殊若比洞庭霜點句傲他傅粉遜施朱

柘城竇靜菴檢討著有泌陽學條規孝經闡義事親庸
言家居創朱陽書院爲中州講學家次子容邃聞子號

檇村康熙乙酉舉人雍正中由舍人改知縣之官蜀中
錢文端爲題靜菴先生訓子圖云先生際昌期行醇學
亦正窮達無殊操脩短能受命禮義爲菑畚典籍中緯
經講學朱陽閒懦立頑可訂我生恨已晚未遂執經請
每於所遺編一一深攷評學規無支詞忠孝乃其柄其
餘諸述作無不本庸行在易非探奇卽邇可明性豈惟
榛莽開自覺功利屏私淑三十年去蔽事心鏡昨夏識
令子旅寓喜鄰並粹然儒者姿守已志已定家學夙所
承門材斯爲稱篋中訓子圖展拜我生敬風和披春容
山立仰剛勁庭草不須除琴几有餘淨叔也舞勺年隨

兄事陶泳昔爲白華潔趨侍樂溫清今膺百里符初筮
觀爲政從來稽古懷高步慮易勝坐言洵非虛民社始
一證期子報循良好抒昔未竟毋令韓退之嘲笑投短
檠聞子能讀父書以聖賢爲可學宰新甯多惠政嘗製
大堂楹語云嘖笑閒可識兒女真情誠求未至敢云無
不是的父母政教內自具權衡妙理稱量得宜方信沒
錯斷了分毫可爲牧民忠告

雍正癸卯鍾祥楊炳筠谷以第三人及第 憲皇以登
極首科恩施格外與狀元金壇于振榜眼上元戴瀚俱
在南書房行走筠谷尋疏請養母林居二十餘年秋夜

同胡石圃訪林一凡有歸逢醉尉休予詈故李將軍未
有名之句

方小師幼年學畫山水汪令聞千金聘黃尊古作畫小
師日窺之學遂大進得意之作皆鈐偶然拾得四字小
墨印韓江雅集在讓圃樊榭與胡復翁程萍江馬氏昆
季聯吟小師及弟右將預焉其畫錄入內府石渠寶笈
畫冊有題云坐久月當戶露涼侵鬢絲江湖新雁少遊
子達書遲拂簟不成夢倚闌無限思螢光忽明滅已近
授衣時秋夜盼兒子家書不至作也

雍正甲辰陳文恭以檢討改吏部郎中遷御史出知揚

州擢江南驛鹽道俱帶御史銜得便宜奏事節鉞所臨
歷省十有二歷任二十有一與尹文端同年文端當機
務旁午時以整暇處之事無不就理公則終日刻厲無
幾微閒風趣迥殊而最相得皆以乾隆三十六年薨其
奏疏文檄具載培遠堂存稿文孫蘭森受業于張少儀
少儀桂林相國輓章云絕學瓊山後昌言給諫初勤宣
中外績力闡聖賢書 主上知孤立神明懍獨居古來
房杜輩篤行幾人如當世益莫不推公之學以不欺爲
本也

汪文端于雍正元年用徐文定薦起諸生預修明史甲

辰成進士撰擬之役從晉江陳對初質所業 裕陵卽
位以侍讀授館卿仍兼記注入直南書房乾隆丙寅以
大司寇用張文和薦參機務金川用兵屬草之役皆文
端任之 上嘗臨顏真卿書朱巨川誥敕軸中有典掌
王言潤色鴻業貞廉可以勵俗通敏可以成務云云召
對時輒賜公以示意駕幸盛京從官進和詩御製褒目
有畢竟老成遠獨步之句乾隆戊寅卒官賜奠五律有
云贊治常資理論文每契神集其書爲時晴齋法帖勒
石內廷劉繩菴相國以詞科後進暇與論文舉羅鄂州
之言作文不在詞澁言苦使人難讀在于高其理古其

意以謂公文足以當之公笑曰某則何敢云然然子言知節要者厥後于紀彭劉當直應奉所以克副主知者胥此道也

李巨州爲穆室侍郎第六弟甲辰登第後養母不出諸襄七七愛詩其一爲巨州云臨川有季龍每見豁懷抱經戶闐無人披帷富搜討悠然挹皇墳適意忘溫飽卽此壺中冰可以蠲熱惱以朱高安薦就徵會城別姪子元長詩有旁人誤指徵書急子舍依依戀故園之句所著南園答問杭大宗謂與柳州晉問深甯七觀頡頏西江掌故此焉爲最乾隆鴻博所取較已未爲隘才人多

被黜落曹良甫讀詞科掌錄句云朝廷自急求賢詔宰相終嚴取士心紀其事也

馮可賓芥茶牋環長興境產茶者曰羅嶰曰白巖曰烏瞻曰青東曰顧渚曰篠浦不可勝數獨羅嶰最勝嶰而曰芥兩山之介也羅氏居之在小秦王廟後所以稱廟後羅芥也鮑辛浦吳興集芥茶歌云採桑未了採新茶紗帽棋盤品目賒惟有夕陽真廟後絕勝中外與雲霞

中外雲霞皆洞名

亂山合沓芥相連小滿何如穀雨前但得晴

明少陰雨香風比戶拍茶天顧渚曾誇紫筍名祇今羅嶰毓精英世人但解稱陽羨茗飲誰操月旦評當年天

府重頭綱綵袂龍綃貢尙方 聖代無勞催騎火薦春
臺榭已荒涼薦春臺在城北舊時貢茶拜薦于此 國
初停罷

鮑之源崑發爲辛浦先生族子性嗜書手錄經史諸子
數十種辛浦有口占絕句云等身還計尺衡石劇紛如
檢點巾箱裏時添鎮庫書依辛浦於長興爲騰寫詩卷
亦有志學詩辛浦句云好將紅錦緞莫愛紫羅囊勸其
德業并堅其嗜好也丁未崑發移居辛浦爲書一聯云
身如社燕頻營壘迹似浮萍少定居嘗戲謂吾族人大
抵無片瓦立錐賃屋棲止者比比卽以此聯家書而戶

揭之可也一時羣從皆掩口盧胡而笑因成一絕句云
人海茫茫幾播遷勞生難得買山錢好將社燕浮萍句
留作吾家故事傳亦見故相清風澤延五世猶能作書
生門戶也其諸草廬太史餉米戲報三絕句平生懶作
乞米帖老大徒看干祿書生世常懷謝仁祖不圖真與
古人居四斗何郎食不窮依稀彭澤折腰同若教世盡
如君輩那得堯山有富農玉堂署冷一條冰裁說天家
祿賜增何意便隨分減例肯教布施去聲在家僧
宜黃藍長清千秋雍正四年以諸生薦授國子監學正
累官盛京戶部員外郎有石鵑山房集洪介亭過藍戶

部故里詩先生豈合住樊邱老作龍門汗漫游鴻博未
登華秩選公卿特爲吏才留金臺首藹盤中冷鐵嶺風
霜塞外秋尙有高文傳石鵑何時一訪讀書樓

聖祖皇子貝勒允祁字東山號寶齋齋主人幼耽吟詠
以塞曉亭直諒多聞相與劇談往還無閒甲子曉亭陪
寶齋主人宏善寺看花有仙人三里霧帝子五雲車之
句又有次韻寶齋齋楊花及奉和主人見寄元韻之作
惜原詩未之見也與馬大鉢李廌青善大鉢有和其水
仙絕句應教二首兩次訪廌青於蘿邨廌青同大鉢上
謁奉和主人作云縫掖深衣大小冠相扶相逐步蹒跚

煙波鷗鳥雙情狎秋雨薜蘿一色寒鄴下才誰驚幕府
市中人竟老邯鄲行藏頗似殘書史只有河閒掇拾看
冰簟湘簾氣象殊追趨眞見盛文儒詩壇誰敢先牛耳
藝苑何妨試鼠鬣淮海微禽今日化龍門雙鯉一時俱
鄒枚不敵相如勁作賦梁園授簡無謂賓客謝香祖也
曉亭卒後主人爲序其集有吾將誰與之歎乾隆四十
九年由固山貝子晉封多羅貝勒郡王品級五十年薨
諡曰誠

興縣孫文定公以不自是匡弼聖德每事必廷諍 純
皇帝輒曰汝又以古大臣面目對君矣海甯陳文勤公

每值民間水旱疾苦必反覆具陳或繼以泣 純皇帝
輒霽顏聽之必笑曰汝又來爲百姓哭矣後此則諸城
劉文正公最著立朝大節始終倚畀屢奉使遠出挈二
奴用馬六七匹事事不過令甲兩金川之構難也每召
對屢主撤兵議一日 純皇帝在熱河急召公問計曰
木果木價事溫福已陣亡朕意不定用兵乎撤兵乎公
曰日前兵可撤今則斷不可撤問誰可任以阿桂對

純皇帝曰汝言是朕意決矣槎河山莊在東武九仙山
麓文正曾祖西溪農部別墅公嘗讀書其中之錦秋亭
唐毓東爲作圖其詠柳絮詩云嫩綠常瞻鳳輦巡交枝

深鎖玉園津遲遲日轉當三月點點花飛送暮春曲院
飄連斑筍籜游輪碾伴麴絲塵悠揚自趁芳菲節留取
濃陰蔭喝人向例鄉會典試官不得與外相通乾隆辛
卯文正典試禮闈以承審事令內閣侍讀嚴長明至闈
中而人無異議潘榕皋感舊詩鎖院開門日灤河獨對
時廉能絕物議公不畏人疑

周子振太守中鎡起家崇明縣丞宰華亭攝六合所至
皆有恩雍正丙午擢守松江焦南浦有絕句二十二首
頌其治行修婁水渠舟覆殞歿贈太僕卿後此則乾隆
聞河決張瑞書以陝汝道督工沒焉姚惜抱詩所謂王

尊勇竟爲冥死趙孟儕還謝禹庸者也

沈文懋序虞山釋素風息影齋詩云詩貴有禪理禪趣不貴有禪語王右丞詩行到水窮處坐看雲起時松風吹解帶山月照彈琴韋蘇州詩經聲在深竹高齋空掩扉水性自云靜石中本無聲柳儀曹詩寒月上東嶺冷泠疏竹根山花落幽戶中有忘機客隨江山魚鳥煙雲花樹友朋酬對皆能悟入上乘可以證禪理與趣足也宋人精禪與者孰如蘇子瞻然贈三朶花云兩手欲遮瓶裏雀四條深怕井中蛇意盡句中言外索然矣長壽菴在石梅小三台下自午月恆公化後析爲二素風住

西頭錢圓沙號以西菴作說以記之馮簡緣顏以息影
與王僉憲西澗陳進士見復汪貢士茶圃侯秀才秉衡
王秀才東澗過從酬唱乙卯克復東菴素風有詩云拋
去東菴二十年往時庭宇尙依然牕虛好倩閑雲補籬
缺還分活竹編剔蘚續題新得句移筒重引舊疏泉劇
嫌衰老偏多事廢卻蒲團半日禪桑閒三宿早因依白
首重來感夕暉觸目山光仍是昔回頭人事已全非梅
迎舊主衝寒放雲認孤松向晚歸從此杜門堅息影那
容殘夢出巖扉王西澗和韻云居士爲家不計年贖回
屋宇尙依然徑將細石和苔補籬拾枯枝帶葉編得暇

攜鉏巡舊圃有時拄杖刺新泉未來過去多成幻見在
心中卽是禪諷誦瑤章韻可依詩家誰是謝元暉桃干
樹已成前度柳五株今悟昨非事比還巢春燕至人同
行腳老僧歸羨師飽看青山色許我閒敲白版扉夫以
息影焚修猶不忘恢復舊物嗜欲可捐勢利可忘形骸
可外而眞性情不可泯柏東臯謂素風幼失怙恃垂老
猶繪椿萱圖以識哀思無眞性情者不可與言詩又烏
可與言禪哉

閱廉風詩骨清秀與張漁川馬秋玉方環山唱和爲多
重過田隅草堂有感云舊識溪邊路草堂疏竹籬樹成

人去後秋老客來時白鷺一雙影枯花三兩枝裴回欲
愁絕鄰笛正孤吹過環溪云移門當竹徑插柳護山田
野水明籬外疏梅落檻前朝來課春作客去理殘編不
信歸林下郎官正少年蒙谷在蜀岡後唐時貢茶有春
貢亭廉風詩蒙谷中間三兩家滿園茶樹自生涯雨前
嫩葉從教賣官裏而今不貢茶

清江楊勤慤巡撫廣西知梧州府戴肇名私餽人參諱
其名曰長生果峻卻之具以聞有不愧四知之褒督漕
最久所著漕運全書黃雲門嘗表上焉小詩如詠螢云
風前雨後往來頻入幔依簾解近人剛有流光能自照

已忘腐草是前身特見比興

前後詞科江右李石臺侍講潘立夫諭德皆以時藝擅
名侍講詩如到江芳草盡出郭遠山齊溪聲時作雨雲
態欲移山諭德詩如鴻濛隱几眞忘象虛白交肩任守
雌只合巢書消二六敢誇奏牘滿三千皆可誦

金長孺小詩清麗秀州竹枝詞云鱉行橋外是嘉禾點
點瓶山染黛螺螾蛤魚鹽通百里畫闌六里接春波新
絲千絡挂新城霧縠裁來特地輕滿巷朱藤春晝寂綠
陰庭院理梭聲韭溪溪水到官河瀟灑匏尊試月波紅
蓼花中疏雨歇酒船都唱采菱歌舊家歌扇葬鴛湖鐵

笛風流許繼無香冷芙蓉人醉也更拈沈水爇張鑑春
詞云十二紅闌掩畫扉垂垂香穗午煙微桃花釀雨春
雲重一燕低從柳外歸岳州卽事云人家水上起樓臺
瓦縫參差徧綠苔楊柳磯前三日雨白鷗飛過女牆來
杭堇浦謂世多稱漁洋山人詩而莫稱其古文稱長孺
先生時文而莫稱其詩梁山舟序小樹軒集引其語手
書弁首漁洋誤作漁陽當時竟未改正

金長孺嘗溲麩代奕具半塗以墨戲成斷句云不信膏
環可代碁粉搓墨染恰相宜探囊便作匱中戲國手原
來是餅師映紙曾將薄托夸文楸今喜麥光斜舉碁不

定休相斫墨守公羊自一家
膈膊遙傳興自清輸他狹
巷短兵聲南風不競君知否
一道鷓兒破麥城閒敲不
覺動鄉思茶鼓餉簫麥秀時
看賭別音必碁香市女玉泉
亭上飯魚兒明熹宗時浮梁歲進別碁若干副卽鼈碁也見西江志浣花遺局爛
柯山一紙眞同十部賢
拚作人情堆粗糲不論勝敗總
欣然手談風格憶禪林
飽食何妨此用心莫向長安矜
絕品幾回翻餅費沈吟

武進趙賡西都轉
侖敷恭毅公孫裘萼侍讀熊詔子也
家白雲溪己未秋自浙北上過里門有疊乙未雲窩韻
六首完顏卓亭河督偉時按浙江嘗和韻云春染鷗天

綠到門雲莊面野趣常存茶槍雪泛盧仝椀花醞香傳
裴姥墩雙槩煙波逢釣叟孤筇松磴得詩髭知君素具
山林癖蘇白風流結性根漫追卜築幾經春景物依然
潑眼新喚渡人聲煙外遠逼城山翠雨中勻敲碁賭墅
應名謝投轄留賓合繼陳靜對平川飛逸興一行寒鷺
下沙垠短短牆垣雲度低爭誇門巷灑東西柳塘水暖
圍魚罩花檻泥香穩燕棲淡擘春蔬參玉版鮮烹秋味
啜金壺此中樂事真無極乘興時酣綠一甌綠野夷猶
偶得閒千秋事業在人間心緣報國常懷赤髮爲憂民
早見斑夙志司勛攜雪權前身太傅探桑鑲應知正切

蒼生望高臥空思欲買山輕帆飛破語溪煙吳岫漸江
仍眼前摩詰圖中臨鞦水淵明詩裏憶斜川琴調古韻
花搖席鶴伴清遊月滿船出處無心雲一片南華試讀
物齊篇湖山花柳錦成茵春入禽聲喚處頻樂得魚遊
當鏡躍笑將梅共傍檐巡林泉勝引怡雲客耕鑿歌聞
擊壤人自是清華舊門第一囊風月不爲貧卓亭以乾
隆辛酉督南河先是高宗以黃河大溜逼近清口倒
漾爲患命循康熙間舊迹開陶莊引河導黃使北鄂文
端往會高文定勘奏議甫定以汎水驟集積淤停工文
定尋亦去任至是卓亭相度施工奏請自清口迤西黃

河南岸添設木龍以資挑溜向北自是陶莊引河之議
遂寢木龍之議倡自文定卓亭踵而行之蓋慮引河功
不易就欲圖補偏救弊之爲厥後四十一年 高宗獨
申睿斷決意開之踰年而功竣新河直抵周家莊始會
清東下去清口較昔遠五里倒漾之患永絕 御製有
陶莊河神廟碑記其事壬戌移督東河甲子正月奏言
山東連年被水由於上游散漫下游梗阻運河南接汶
泗沂濟諸水洩入微山蜀山南旺馬踏等湖北接漳衛
二水洩入鹽河徒駭馬頰鉤盤等河遇伏秋異漲每宣
洩不及應於運河內增閘壩以分其勢疏下河以暢其

流其經由州縣支分派別或有淤狹溝渠殘缺壩閘墜
堰均查明浚修卓亭爲松裔少宰昆季行由內務府堂
主事歷戶部員外郎揀發河工於河事固習知利病也
山陽邱爾求爲其甥周白民論詩謂詩以道性情歸於
體要強笑不歡強哭不哀無情之言雖工不貴予庸謹
刻其翼堂詩二卷句如風將春麥遠霞帶晚山晴歲除
鄉夢裏春到酒杯前草蟲近作臨窗語林果時聞墮砌
馨出以澄汰自是雅音其賣書三首云掌錄胸耕半世
中縹緗倏忽竟成空區區草木還留戀轉笑平泉李衛
公癖性從來無別嗜晚年生計重堪悲於今一似龜堂

老典到琴書事可知平生鹵莽良多負一旦風花信所
歸猶有烏焉讐未了開函撫帙重依依

雍正辛亥高薑田領郡漢陽舊轄漢陽漢川兩邑時甫
割隸黃陂孝感兩邑金長孺時官孝感有知己之言謂
任常德長孺賦長句四首送之其四云宦途常恐受恩
多獨受恩多可柰何紅燭半條知己淚清秋一首送行
歌逢人說項憐風漢勸我低頭拜浪婆三十六峰常在
眼鯉魚頻托洞庭波

高薑田孺染家學特工書畫查初白贈薑田詩云詩得
派來流法乳書成家後笑羊肩徐桐村編修南歸薑田

以指畫爲贈有句云只有家雞儻舊諾更將里曲博新
詩居官清廉有守其讀史雜詠云租調徵無時絲穀糶
賣早所以陽道州自書下下考于鶯歌聲歇柴車便去
官可憐好眉宇不使後人看解組後僑居天津家無長
物塵卷蕭然時與金金門劉雪柯查次齋金芥舟相唱
和焉

廣甯張時齋相國由光祿寺典簿授甯國同知擢守楚
雄廣南曲靖並著廉能以鄂文端薦由糧道游歷兩使
雍正八年擢滇撫蕩平苗獍功在邊陲恤鹽井興水利
舊制滇黔各設總督後改制亦屬於滇遂兼任之通金

沙江自此蜀越可通梁益荆揚一輦可達乾隆十五年
授東閣大學士兼禮部尚書十六年卒諡文和張少儀
挽詩云廿載西南柱石身曲江風度動丹宸功名自照
金沙水耕鑿相忘漆齒民甫入黃扉驚異寵遽拋紫綬
等輕塵碧雞坊裏花千樹猶憶年年似海春曾荷山公
汲引勞篋中空有呂虔刀幸無雅拜羞知己仍不擡頭
廁末曹今日更誰餐脫粟當時何啻飲醕醪重來痛哭
西州路闡闔沈沈月影高陳榕門相國官滇藩爲公屬
吏迨榕門擢撫西安文和三年自陳例得舉賢自代遂
以榕門入告稱其以實心行實政視國事如家事尤見

知人之有真識也

雍正甲辰王文肅以會元榜眼入詞林初謁座主高安
朱文端公謂之曰學人通籍後惟留得本來面目爲難
由是終身行之數舉以勵學徒視學廣東舊制院門嚴
啟閉公曰人苟無欲雖日啟門何患乃設西齋日延見
諸生教以讀書立品乾隆五年以都御史出爲巡撫迎
養老親 御賜五言詩及豐貂文綺計典察吏不事苛
刻每日官數易則民不靜而吏滋奸易者安知必優于
去者十一年官禮尙釐正通禮總裁會典一手編集凡
十載而告成二十一年以吏尙請疾次年卒于京師詩

如游蒜山云杖策期我侶極目煙嵐飛披徑躡曾岡緣
源面修碕空水寒無姿淡綠生已微蹉跎一老僧隔澗
開山扉延客坐松寮梵響生清機谷幽光易暝江遠聲
逾稀眾籟窅然合心清無是非憇久神彌愜徙倚愴忘
歸舉手謝前嶺逶迤窮林霏山光引遊子窈窕乘險絕
路歧情屢眩徑錯興逾發修竹翳曾陰危松綴殘雪眾
鳥寂無聲騷屑林響徹石氣入昏冥川光互漂擎岸轉
失來蹤谿明得前白白日下江皋餘霞蕩晴碧夕嵐落
千尋空色遞相激握手尋舊蹊一一想所歷忽看江上
月遙遙挂蘿壁石矐先生淵源所自出也

桐城胡龔參司業宗緒明歷算之學著有簡平儀注對
河決問禹貢增注或問字學音韻辨辛亥乙卯再貳成
均從游者甚眾姚南青及吾鄉鄂昌克及鄂敏鈍夫鄂
倫敘天皆其門人也家環山詩文曰環隅集拔茅山夜
云山中氣早寒霜白草短勁入夜窈窕林蟲鳴有餘靜
土屋閉深月隙光流一寸薄飲不成醉疲肱已可枕浮
累麤遣除荒夢細商訂獨樹驚高風亂響集孤聽山鬼
呼欲來幽釭剔已燼披衣觀百念攬鏡槁雙鬢詩格在
柳州東野之閒石門菴云匡頭坐老佛定僧擁白髮山
與夜俱深厓溜滴寒月亦是唐人興象

儲六雅詩麝帕羅裙醉後妝翰林才子寫詩章三春花
柳黃家女錦字何緣寄永昌謂楊用修黃夫人也序秀
林山人陸鳳池詩用此語山人爲曹諤廷黃門繼室外
家闔室皆攻詩幼學爲之下筆輒有風致兄錫山教之
讀離騷黃門有詩云幽意閑情不自知碧窗吟徧楚人
詞添香侍女聽來慣笑說書聲似舊時康熙辛卯卒黃
門掇其詩詞爲梯仙閣餘課陳恪勤序有云高柔室內
都成贈婦之篇蘇蕙機中時有望夫之句崔夫人桃花
靨面長留兒女之悲韋蕙叢蓋篋搜衣空賸鴛鴦之製
令嗣菽衣昆季刻四焉齋集附刊焉

曹劍亭烏蒙鎮劉公挽詞云烏蒙塞外陳雲懸錦水江
頭碧血鮮慷慨一生餘七字從容八口向重泉誰令小
醜妖鋒熾獨有偏裨浩氣全最是秋風腸斷處黃沙白
骨滿城邊烏蒙游擊劉崑玉巖保甯人雍正八年苗疆
新闢於土司祿鼎坤烏蒙故地置總兵官鼎坤子萬福
嗾眾反崑轉戰至鐵爐山弩穿左脇創甚醺血大書石
壁上淋漓鮮血透征衣報國丹心總不移十四字拔刀
自刎死城陷妻張夫人女易璋可璋妾吳氏同日死時
同殉節者通判彭澤劉鎮寶等幾四十人明年改烏蒙
曰昭通府

郝蘭皋賭郎行詠雍正閒宣城黃池鎮人陸生鑑明事
也陸家賢婦有焦娘嫁得兒夫是賭郎一擲曾聞連百
萬傷心何意棄紅妝紅妝本是良家子十三嬌小學書
史香閣裁成芍藥篇吟窗養就芙蓉紙方期金屋貯阿
嬌誰料紅顏爲君死陸郎輕薄秀才家終朝團局作生
涯窗下青鐙常黯淡枕中白骨任撾拏是誰留下陷人
阮邪鬼不生世不成囊中金盡眠方穩榻上鐙昏眼愈
明暮暮朝朝都不辨么么六六時相戀寒士曾無避債
臺佳人屢脫黃金釧金釧雖亡何足悲兒夫浮蕩淚雙
垂一局那能贏別墅千金豈有賭蛾眉錢神不媚酸寒

骨骸鬼偏欺薄倖兒仰屋計窮猶技痒手中還作摩挲
想博進負人積似山中袍典盡鳴孤掌恨殺奸人黃黑
心強將窈窕抵多金黃金有價人無價白璧雖沈志不
沈本謂多情戀箕帚何期掩淚辭藁礎低眉欲寫心中
事下筆難傾言外意粉扇題成絕命詩湘裙書就斷腸
字溫柔敦厚繼風人悱惻纏繇動星使封章朝奏九重
天祠典新邀大表賢蕩子權爲香火使富豪罰以萬千
錢斷指錐心甯云報綱常凜烈斗山懸森森松柏清風
廟至今過客猶憑弔繡槃已自表千秋齋曰還應稱二
妙黃池村下漾愁津花草經年怨不春賭局風光還似

舊芳魂月夜定如新殷勤欲問狹邪子可有深閨飲泣

人

康熙未建甯北鄙鄧某婦李氏未婚而某死李不屈于父兄之暴卒婦鄧以節老焉妯娌皆化其行鄉人稱之朱筠園爲作孤鸞行以序其事云孤鸞對明鏡宛轉不能已一顧肝欲摧再顧魄已褫妾身年二八未嫁夫遽死父兄性行暴怒妾回家裏交揮恣鞭朴長跪不敢起詭言謂父兄容妾一回視乘車入家門長慟感閭里除我金玉釵換我羅裳襦爲我頭上鬢服我斬麻裾再拜謁尊嫜珍重衰毫軀妾屬翁子婦代子相持扶私覲妯

與妯式好兩無虞回家未三日父兄已來迎迎妾意何
爲憐妾饒苦辛豈惟良人徂況復家窶貧門樞腐敲側
牆毀施蒸薪鼠雀飢鳴喚甑中揚埃塵不如依父母爲
爾締好媼東鄰富巨萬獸炭燒麒麟西舍貴無匹霞帔
光耀春妾謂父兄言胡爲入我耳釜中炊餐熟餐熟難
成米旣爲鄧氏婦甯須李家女女能任操作無遺父母
累入居破室中瑟瑟風撼帷皓月照妾歎秋蟲伴妾悲
期年復三年大小祥已逾爲更頭上絰爲換麻衣裙永
拔金玉釵長疊紅羅襦妾身未面夫屬纊猶見之妾夫
固無子兄子可爲兒犖礪南山田可以扶犁治環舍桑

百株穠葉青猗猗夏纈蠶千簇秋漚麻滿池朝織常至
晏暮織不知疲都忘歲月疾鬢髮拖鬢絲何意奴與妯
相繼成孤嫠念婦未共牢磐石猶不移矧我洽言笑何
忍遽乖離大節不獨完兼以教人爲室家日漸給產作
無休期撲朔白兔腳趨走來街墀里正相奔告搢紳咸
吁咨有子願爲母有父願爲兒丈夫願得婦閨婦願得
師越雞能伏鵠魯雞何所需靈芝耀林中安用根與株
不見鄧氏婦生女合哺脯生女合哺脯彼哉茲丈夫
南海何報之初宰思恩有寒坡嶺嘗取以爲號秩滿移
牧遼陽有詩云六載寒坡屋外看寒坡名號稱寒官今

來亦有寒坡嶺始信寒坡到處寒襄平雜詠之四云駐

蹕山頭望即首山唐太宗征高麗駐蹕於此當年萬馬迴白袍人已去

阜帽客何來林木陰森台風煙颯沓開不須問城郭歸

鶴亦生哀遼城風味好白小即銀魚出冰天此物真堪飽

香梨只浪傳買糖過古刹澄麪濾新泉不為居無竹留

家禁嚮邊太子河銀魚干山香水梨白塔寺麥芽糖及澄麪並遼陽佳品豬肉亦賤而美可惜

公孫氏興亡指顧閒頭方行萬里星已落前山公孫淵被殺先

一夕星落首山綸賈殲何忍原甯去不還空餘荒堡月長照土

花斑公孫度自稱平州牧平州在今城西四十里有土堡東望摩天嶺峰巒秀出

羣陰崖多積雪幽壑半留雲星斗時堪摘華夷此去分

東去百餘里高麗界

通關延貢使來往不教聞

高麗貢使來往州唯關白旗員

人王瑤峰京兆爾烈乾隆辛卯傳臚與館選和太菴嘉慶辛未過遼陽城訪瑤峰故宅並索齒錄及遺稿云華表峰高宿草肩杳無鶴唳到空庭青年昔共趨三殿白髮今存聚五星

庚午與馬朗山邵海圖鄭秋圃李雲門會於京都俱近七旬

千里關

山慙挂劔一門衣鉢許傳經書田不沒生前草滄海遺珠信有靈皆可入吾鄉州乘餘聞

常熟汪杜林應銓陳見復祖范王良齋峻與陶穉衷正靖皆以文章氣節名於時有四君子之稱穉衷太常晚年得第深悉世變輪奏經史摺子皆推經義以言時事

反覆詳盡侃侃有古大臣風嘗論吏道雜而多端丞簿尉率非其才請聽辟置學校教養無法州縣易置不常引周禮陳殷置輔三德教國子及漢時久任之法又引易泰二爻紬繹馮河之義破難行之說極論媮爲一切自恣苟簡之害自記進謁梁村先生叩以詩民勞篇逡巡未對先生曰此詩重戒詭隨八章中獨此句不變因極言詭隨之弊聽之悚然以九卿歸田至課讀自給孝思清節有始有卒其輓鄂靜齋年丈云掌綸非不達知節是詒謀家法河東盛門風萬石優履盈彌自約守道復何求華屋高蹤在應教石碣留西林家風於此可見

陶樾衷太常詩說多切於國政世變如云秦於東遷後
僅伯爵未有僭稱而無衣三章皆曰王子興師其卽小
戎之義與抑出定襄王晉侯辭秦師而下之役與蓋忠
義激發之辭也朱子以爲仁厚之俗一變已悍然有招
八州朝同列之氣愚竊以爲不然蘇氏以爲周之東遷
失計爲甚蓋其初本以避犬戎之難也然秦襄一用之
而勇於敵愾如此則夫棄先王成業委形勝之地與可
用之民卒至削弱不振者是誰之過哉夫子錄秦風所
以深惜之也又云魚藻以爲諸侯美天子未詳所据也
蒲藻皆水草藻無根而蒲有根魚在藻則樂矣依蒲則

尤安此詩之作其在東遷時乎關中之地據形勝臨諸
侯視夫阨嶇河洛之間可同日語哉故曰王在在鎬有
那其居詩之本指顯然可見矣然則周公之營洛也非
與曰德之休明無所事險若德之不建而依險爲固焉
亦謀國之次也其潼關詩有云秦晉自古稱匹敵設險
豈不在高墉晉啟南陽苞關外全力足捍山以東地分
勢弱秦始大長矢莫射天狼胸鈞天亨罷帝有醉天王
先自捐岐豐維斯籍虔競裂土一時快意終覆宗小人
反復諳形勢乃於分後謀合從儒者區區謹名分豈知
姬籙已告終我昔箋詩獲新解那居無衣義則同有民

可用地可守棄擲罔念前王功全謝山稱其說詩獨到處范逸齋嚴華谷不能過也其兄貞一退菴集深於班史亦多平情析理之言

雍正十一年梁文莊選入上書房侍講讀受知高宗乾隆初官戶部條奏八旗閒散人丁宜分置邊屯以資生業綠營增設兵丁宜量停募補以減冗額略言每歲天下租賦除官兵俸餉各項經費外惟餘二百餘萬實不足備水旱兵戈之用今雖府庫充盈然乞皇上以節儉爲要慎勿興土木之功黷武之師以爲持盈保泰之計嘯亭主人謂謀國遠識與舒文襄之言內營火器

阿文成之議綠營名糧並稱至於迴翔禁近資望最久

賡和之合

聖製筆迹之蒙

睿賞誠餘事矣

文莊主順天己

卯鄉闈先高祖實出其門

杭堇浦序張南漪先生集謂南漪長於史學蠶紋細字藏於篋衍者幾數十萬言晚乃一意治經其書宋貞女事云劉向云衛宣夫人齊侯之女也嫁于衛至城門而衛君死保母曰可以還矣女不聽遂入持三年之喪畢弟立請願同庖終不聽乃作詩曰我心匪石不可轉也我心匪席不可卷也厄窮而不閔勞辱而不苟然後能自致也君子美其貞一故舉而列之于詩昔長水朱先

生嘗爲原貞矣顧曰女子未嫁而夫死終身不嫁蓋禮之過焉者經傳所未詳也其不然乎魯詩最先出又源自荀子其說宜多可信而向詩學魯詩茲事當得之師法然則未嫁守貞之義聖人固已著之經以立教彼夫禮者特緣情而作不欲設難行之事以責人耳豈得謂聖人所未嘗言古無其事而且沒其人耶堇浦謂其爲文自戴表元揭傒斯未之或讓此文可見一斑詩如嵐開山轉秀風定柳仍疏別澗有聲爭入浦暗雲如夢欲遮山亦見清雅

張南漪蕭孝子曰隲傳論云自唐青陽孝子以割股聞

因其迹者並著于史至夫割肝獨見宋萊州呂昇然皆
不死今孝子竟死則創鉅也吳賓賢吳氏詩序云吳氏
名伍安豐場人嫁魯高高父病篤聞里人有割肉療親
疾者以其事語家人欲高效之也時高亦病婦人乃慨
然代高引刀割左肱肉刀利切骨血流十二晝夜死見
者莫不悲之孫豹人謂世多有割肱肉療親疾者亦非
盡好名也蓋人子望其親之生計無復出而後爲之而
事亦不令其親得知然君子猶惡之未聞父可以此責
望其子也秦州魯高婦吳氏因聞舅病中羨及里中割
肱兒遂代其夫效行之刀利竟致死余友賓賢有哀詩

雖心存忠厚而義闕垂戒故予和之旨略異焉詩云種藕池塘中年年得蓮子索婦配嬌男但求主祭祀田家惡伐樹樹色自然濃將兒代百草智異於神農病翁老且愚弱男惟一箇長歎復大羨隣兒孝最大隣兒孝若何割肱療其父意使新婦聞勸塤效此舉背塤坐燈下向燈自引刀妄冀有鬼神不死功當高亦不謂無鬼亦不謂無神聽婦一人殞將戒千萬人十二晝夜中嗚呼血不止鼻病亦不增但哀新婦死新婦誰家女姓吳名曰伍自從于歸來蘋蘩滿筐筥新婦家何方生長安豐場安豐道學里王氏有祠堂道學去已久風俗今漸醜

奇行恐難繩中道庶可守汪叔定謂當與韓昌黎鄴人對並傳

陳寶所諫院種柏二首和傅巖溪中丞元韻云官卑行其言夙夜敢弗愛重戴非虛榮章身況繡薦柏臺懷曩規風節緬前輩復古勤種植雅意良可會盤桓撫貞柯慶霄挺蒼翠雲霧廣廷春清含良玉珮貞心貫四時勁氣周外內際茲風雨和披拂靜眾籟願言集嘉禽誰鳴消百怪凡茲臺中人顧名義斯在讜論心所勛願學非曰能風徽稽簡冊今昔何紛騰擷華愛庶子采實懷中丞譬彼臭味別聿覘草木靈歷時無改德九九安其貞

美蔭思甘棠勝事比槐廳古義如可贈俯仰同一情情
深動良惓所得是芳型盛位赫赫光嘉氣滿彤廷常想
圖雲幹獻壽君子庭巖溪高安人家於滇由檢討轉御
史醕篤直諒所言去奸民端風化清獄訟除冗蠹申法
禁皆關國家大計在奉天府丞奏旌王瓚孝子在鴻臚
請復官員謝恩故事慎選序班乾隆丁亥轉憲副整肅
臺綱謂御史爲朝廷耳目不宜兼曹郎請停罷以符名
實得旨允行著爲例都察院稱柏臺固無柏也巖溪植
柏於堂前賦五古詩俾科道和韻焉吳香亭爲撰傳謂
公於少廷尉署種槐柳於御史臺種柏明季殉難御史

趙謨公鄉人也爲之疏請補謚忠愍立祠愍忠寺旁今爲雲貴會館蔡葛山謂其富於詩惜別集未之見也

柳州柳侯祠入祀典唐焜心莊詩所謂柏子深林覆古祠千年俎豆拜羅池也二月十八日相傳爲子厚誕日祭賽甚虔有手書殘石賈人爭購之云投水波浪卽止祠東有賢良祠祀劉蕡

馮文肅管轄事極繁而處之極暇案卷山積必逐件詳閱長身山立聲如洪鐘有凜凜不可犯之色而接見談論極風雅和藹銳于爲詩晚益精悍持論以學杜忌艱澀學蘇忌滑易當以杜入以蘇出於時賢極推重錢獯

石錢衍石題夢堂詩藁云清詞琢雪了無痕爲政風流
憶北門白燕雕梁遠泥滓黃花老圃淡琴尊每懷湖海
陰求士竟賣園亭已到孫蓋獨往園爲張文敏所得矣
潘榕皋詩讀畫論詩憶昔緣歸帆陳迹卅年前歸帆亭
文肅與客談讌處也

吾鄉王愨公以中官涇州州判句如雞聲三塔月旅思
一篷霜沙寒戍迥千山月夜靜樓高一笛風皆有峻拔
之致晚號梅岑題盧溝旅舍云薄宦行囊新典籍鄉關
旅舍舊盤餐此行兄弟歡相慰商權吾廬有釣竿則歸
里時作也

長洲周欽萊詩有菰中集迂村社稿迂村詩鈔鶴阜集
楮葉集黃海集莞叟贍稿虛室吟稿又有文鈔二卷甫
里陳培脈序謂新城先生論茅氏所編偶然八家非八
家外無文也嘗欲取唐人陸敬輿獨孤至之李文饒劉
夢得孫可之杜牧之李習之皇甫持正陸魯望皮襲美
爲十家文鈔迂村文陶冶鎔鍊不立閒架以逐時趨則
與吾師夙昔論文之旨有冥契焉其相思鳥賦云昔吟
紅豆今瞻靈翰動植迴殊佳名並貫賦秉旣異纖采自
宜情從性起恩共義隨豈南土之鷁還相比翼異青陵
之鵲亦自交飛葢相思旣深乎匹偶虞羅忽及而忍離

爾乃舍翦鬱之茂林托雕籠之窄境縱之難去隔之延
頸將翔更下欲違復並幸睽離之可免臨風輒弄其音
喜乖隔之無聞映日必雙其影舊巢已別嘉耦彌親無
能遐舉聊且依人旣相倚以爲命肯獨處以自存夢經
覆葢枝邊有腸欲斷心憶隅山樹上含恨何言爰有天
涯蕩子高樓少婦覩爾含思爲爾俯首俯首如何紛思
實多願續離鸞之舊曲爲爾譜入於琴歌

諸暨余蘿邨懋棟庚戌通籍後自請爲學博己未於杭
州郡學中得表忠觀碑舊石二鄭羽達雪厓傅王露玉
篴王杜悟堂魯曾煜秋塍胡國楷鏡舫范咸浣浦桑調

元弼甫張映斗雪子厲鶚樊榭周京穆門鮑鈇辛浦陳
士璠泉亭沈昌宇泰叔潘作梅戒平丁敬龍泓邵祖節
椒石王鏐高都張守約 毛桓荔園陳士珖月崑陳

景鐘几山陳恆昌聖基顧維正帥堂胡大衍南瑞王惟
桓森柳王汝爲鵝池徐夢元徐邨程南溟軼青王堂笠
坡蘿邨及其羣從皆紀以詩而蘿邨爲之記樊榭詩云
唐政不綱四海淆朱三作賊過於巢鬪雞牧馬盡黃屋
羣雄並起爭咆哮錢王兩淞爲保障職貢世守橘柚包
百年運去識眞主自攜圖籍歸汴郊歐九思公幕下客
何事作史相譏嘲竊觀私誌簸錢謗酌以尺喙非呶呶

表忠賴有坡翁筆文如月表楚漢交大書突兀扶屋極
餘力入石蟠生蛟誰知楊璉築白塔塔材搜索填深坳
淮南張氏又拆毀新城摩雲防寇鈔是時四石僅存二
有人寶惜埋東膠靈芝荒苑轟祠宇伐山置棟谿且庠
墨本重摹失遒勁匹如蹇足追蒲梢今碑爲嘉靖中
守陳柯重刻忽
驚故物仍出土園丁奔告鴉觜拋學官弟子共太息苔
痕橫臥隣齋庖千金已免柱下辱野火幸無牧豎敲報
功復古有位責移置祠廡摹長菱愷悌君子神所勞春
秋享祀和絃匏

丹稜彭氏樂齋觀察端淑仲尹侍御肇洙磬泉司馬遵

泗弟兄競爽皆有文譽樂齋暮春懷仲尹云鶻聲來院
月春色散楊花磬泉蜀碧一書紀張獻忠入蜀事最爲
詳核

貴州提督哈元生河間人爲鄂文端所識拔雍正四年
四川烏蒙土知府祿萬鍾擾新隸雲南之東川府其黨
鎮雄土知府隴慶侯助逆文端檄元生與四川兵協勦
冒矢石奮攻克之六年禽米貼苗陸氏赴阿驢界之阿
路媽會勦雷波土司楊明義搜斬賊眾克阿驢人寨及
拉金者呢等寨由游擊累擢總兵八年烏蒙復叛由威
甯疾趨連躡賊營直抵烏蒙復郡治賊畏之如虎九年

擢提督十三年以揚威將軍進勦古州苗張文敏與之
忤坐與董芳畫上下游界文移辨論日久無功革職拏
問乾隆元年赴西路効力三年卒於軍錢東生哈將軍
歌君不見哈將軍生長回部力萬斤戰若猛虎入羊羣
官防海子一萬賊莽莽直進雲爲黑將軍射之逃不得
縛賊擲空揮寶刀血飛青天一丈高髑體墮地輕於毛
歸來上簿相公喜明光宮中報天子嗚呼安得選將皆
如此楊雪漁黔陽雜詠平苗最數鄂張功礮火窮搜絕
嶮通縱有強梁皆破膽風颺哈字大旗紅張謂吾鄉張

廣泗

張嘯齋學博世進爲顧書宣甥詩法得其指授乾隆初揚州村農掘地得石爲尋陽長公主墓誌銘乃五代時吳太祖楊行密女年十六適舒州刺史彭城劉公而遺其名生男女十二人以順義七年薨年三十八乾貞二年葬江都縣興甯鄉袁墅村稱長公主蓋楊溥時所封也作誌者閩縣丞危德興石藏烏程令羅素心家屬樊榭爲作跋尾嘯齋詩云唐末羣雄揭竿起化源虎視蕪城裏宮中有女賦桃天道旁觀者歌穠矣芳時二八締良緣子女繩繩遠膝前簫聲正喜諧雙鳳曲調俄翻歎百年劉郎幸坦東牀腹僅著官階兼氏族迄今禁鬱竟

無名可預英雄三十六興甯鄉近蜀岡頭鬱鬱埋香幾
百秋芳魂不共東風轉故事徒因片石留拓本摩娑增
太息十國興亡才頃刻當時黃屋幾帝王詎數紅顏一
巾幗主也生當無事時琴瑟靜好唱還隨生前榮寵知
無匹身後邦家漸不支老臣父子何驕甚繼體三君時
懍懍興王自擬隆準公嗣主堪呼狗腳朕可憐遜位徙
丹陽子姓同時赴北邙寶硯翠屏都不守玉魚金椀幸
無妨死葬揚州真得所故宮免見生禾黍假饒白首到
昇元流涕當如永興主

蘄水徐佑倫本仙庚子舉人曾膺鴻博之薦官雲南雲

龍州知州游至監司多惠政有曲辰堂詩選送友云草
蟲入戶西風冷鴻雁南飛木葉秋欲作一行無半字惟
將兩眼送孤舟鶴徵錄所未詳也子立蘇以幼慧爲楊
文定所稱有醒古閣集湖北同時被徵者六人東湖毛
杏山明經一驄有晴雪堂詩集蘄水南念貽太學昌齡
有樛野集孝感李春耀夏策謙漢陽靖道謨其著作均
不可考

鄂怡雲司空詩如萬物甯有常明月自終古颯然懷抱
清結念在天宇天意自平均萬物豈私畜身世等秋豪
勞生何多欲深探至人趣妙理發清辨浮慮自刊除寸

陰甯虛遣幽亭風日佳伫立領眾妙懷抱自空明忘情
獨長嘯山深寂人語但聞野鵲喧鳥道橫虛空孤雲若
可捫清微澹遠深入韋柳之室錢文端題其詩稿有四
詩三筆相門才第五清如玉鏡臺及合是前身王給事
知音曾倚七條絃之句非溢美也

沈東甫新舊唐書合鈔本紀列傳以舊書爲綱分注新
書爲目諸志以新書爲綱分注舊書爲目增方鎮一表
訂正宰相表之譌謬者雍正庚戌錢香樹遇於宣武坊
吳侍御齋中見此書歎曰此今日之王贊善馬鄙陽也
香樹邁私艱太倉王宮詹自塞外歸慰之於苦次聞交

游中有醕謹彊記者因具以告明日宮詹舉以應鴻博
之詔香樹詩所謂卓哉宮詹相門裔俛拾清議多高風
者也召試不遇歸二年以歲貢生卒香樹時在籍唁其
喪遂攜入都陳奏付書局采取入唐書考證中吳斯沼
謂當時或詭辭薦以鳴高或投謝章以掠譽東甫聞薦
卽行不遇卽返亦可見其品格

姚姬川寄葉書山十丈云側聞八十志猶長盡取遺經
發憲章一卷豈容羣鬪市千秋何讓再升堂無人當代
傳朱墨有願平生結老蒼瞻望淮南眞室邇衷衷燕北
又春陽葉劉年歲略相隨先伯同行又後之至貴不關

天子爵齊名起作眾人師青州邴鄭原同術林下瞻孚
候異時四國傳公欣老健一家如我獨漣沔書山以國
子生舉鴻博已未入詞館纂修三禮督學楚黔晚由庶
子降編修告歸著有詩經拾遺春秋究遺袁存齋嘗爲
序曰下詩草其志行堅確不妄與人交與鄉人王懷坡
吏部皆以文行爲後學之師說經則一家之言也

嘉定趙虹飲谷戊午七月自大梁東歸感賦云飄零淮
楚踰河朔轉徙幽州更大梁迢遞關河雙去雁古今歧
路幾亡羊時無燕趙悲歌士坐有邯鄲挾瑟倡但得翠
娥深勸酒不辭醕酹罄清觴問訊滄浪舊釣磯樵兄漁

弟共相依眼看西北高樓遠心逐東南孔雀飛園吏好
尋濠上樂丈人已息漢陰機浚郊不用弓旌辟自署中
吳老布衣自注乾隆丁巳曾應鴻博放還山攷鶴徵錄
無飲谷名王西泚詩話兩相從王舍寺尋秋並載女墳
湖追悼飲谷及李客山周欽萊作也

常熟瞿雲暉副貢康熙乙未嘗與許子遜張雅存沈芝
岡沈子大同在江西學幕雍正中有薦其才行當爲河
南令時田端肅撫豫貪殘不肯爲之屬決棄去齊次風
擬之東漢處士劉文正官詹事以鴻博薦不與試居京
師城西晉陽觀數十年晚節益窮尙耽吟事年七十餘

卒胡稚威詩士有姜徐貴談兼魏晉清薦頻身臥穩詩
瘦病肌恆供佛爲家老論交向晚傾要離千載近吳語
尙分明

余茁邨舉鴻博堅辭不就少饒于財以好施致貧困宿
弟東齋詩云小女夜績坐兩廂小兒聚誦聲琅琅東頭
燈火弟兄共雪屋煮茶冰沍香又寄大男楚中云老牛
疲羸小犢力致汝辛勤作遠客家貧骨肉轉依人百書
那如一見親卒於乾隆乙酉

曹六圃選宋百家詩存錢文端有絕句百首逐加品題
汪槐塘題詩存後云我披天水史開寶逮德祐文章流

別殊各自闢藩圍西崑沿五季遺俗尙怙狃誰復正始
音魯公冠厥首能事王黃州訓詞亦深厚繼之梅歐陽
燦耀光列宿髯蘇一代豪落筆巨鯨叩門下四君子笙
簧迭賡奏同時濂洛賢風雅振先後雖非春葩榮至味
在醕酎紛紛遞述作南渡格變又渭南富天才崇臺九
成構楊監與蕭尤下視匹蓬雷石湖頗排鼻簡齋劇孤
秀終遜子朱子芳潤六藝漱汐社多瓌詞噉殺出泉竇
獨愛晞髮人九歌可馳驟其餘盛藻翰儂指牛毛富惜
哉五百年散佚隨飄颻遂令汲古者荒荒墮煙霧曹君
擅石倉積書屋連表文鑑補呂氏詩鈔廣吳叟憶昨上

元日晴雪滴殘溜肩輿過草堂叢編出懷袖羣言匯百
家目眇浩難究如入萬花谷遙天列錦繡又如對古尊
雲雷錯雜雌賤子嗜好殊讀罷一言祝變體雙井翁造
語獨矯揉江西詩派圖幾輩尙墨守九僧格律麤四靈
篇幅瘦江湖諸小集殺核分飭餽豈無絕塵句駑駿不
同廩兼收與並登要使無雜糅十手急傳鈔百卷付刻
鏤鑿別君自精狂言當我宥讀之可見宋詩之大凡盧
抱經謂槐塘雖少得詩法於厲先生然厲之詩密栗洗
削幽峭孤迥而先生之詩則淡沱透迤丰容流美其天
性固自不同其論詩務在擴胸展臆自罄其性情之真

與杭壘浦張曦亮符聖基王茨檐爲松里五子其史通
跋謂同時柳璨作史通析微駁其紕繆老泉蘇氏誠齋
楊氏明焦弱侯胡元瑞抵隙攻瑕殆非一手予謂評湯
之德爲僞迹論桀之惡爲厚誣謗周公之不臣褒武庚
以殉節甚至彈劾孔子誣妄聖哲誠有不可道者若其
歷敘史家源流體法著爲評議及所論史有三長與貽
蕭至忠書可謂該洽古今庶幾述作同時徐堅愛之謂
爲史氏者宜錄置座右實非溢美持論最爲平允

施得仍爲愚山侍讀曾孫兩世俱應大科之召詩守家
法宰興甯移浙江歷知餘姚德清遷禹州未赴爲前縣

尉所誣解官聽勘不勝其憤病歿杭州歸裝蕭然斥賣
及書卷施竹田挽葉齋詩朱鸞鍛逸翮不得凌紫氛霜
風吹芳蘭無由揚清芬吾子眞健者弱冠空其羣翩然
貢玉堂古器含氤氲一旦紆墨綬飄搖南海濱爲親致
祿養手自漣中帚竭來吳越郊相見彌殷勤旣敦行葦
誼詎以車笠分坐我草堂上唱酬唯卯君餉以紅蓮稻
薦以青泥芹卽事趣彌永念往情愈殷吏道日拘迫丹
墨徒紛紜吾子任汎愛不擇猶與薰蛾眉信皎皎眾口
方狺狺幽憤裂肝膈膏火遽自焚蕭條旅館中長逝傷
幽魂老親淚已枯寡婦啼不聞玉樹旣早埋楊枝安足

云書籍竟何託硯田誰其耘宛溪返舊宅敬亭空暮雲
余忝同岑好感之爲酸辛何年渡江楫雜酒酌孤墳全
謝山謂其才譎過人以課最得召見葺白沙祠爲黃忠
端贖祭田非俗吏所有也嘗與張汝霖集宛雅三編

周穆門題馬和之畫

有楊妹子題

云雙龍小篆玉錢圓淡墨

香消五百年遙想署書楊妹子綠窗朱戶繡簾前洗盡
鉛華馬傅郎獨留綵筆帶宮黃鳳皇山下莓苔綠露井
寒林幾夕陽屬樊榭錄入南宋院畫錄全謝山稱其篤
於倫誼其婦賢而不得於姑穆門戒之曰黃涪翁之姊
文城君困於洪氏雖有三令子莫能申也汝其善事姑

矣婦卒以是困悴死穆門事母益孝然私憐其婦終身
不更娶有弟已析產乘穆門出游而鬻其居穆門歸更
僦屋不以一語及之錢東生謂厲杭才各橫絕吳西林
及周亦自錚錚佼佼唐賢風味則稍衰薄矣曉過德州
河云卽次停驂客夢殘又攜殘夢上征鞍小人有母憶
嘗食游子離家空復還沙月渡頭斜已落野風林外曉
生寒廿年明發天涯淚到此眞成行路難蓋源出劍南
者也

邠縣許士元上舍儒龍爲新繁楊丹山廉使宏緒壻丹
山官福建士元往依焉時陳句山觀政

疆多與唱酬

吾鄉楊靜山光祿秘巡撫四川薦舉鴻博詩如帶雨馬
如寒夜犬穿雲人似早秋鷹茶山細雨人如蟻野店當
門樹蔽牛皆佳兩次大科四川得舉者士元一人而已
邊隨園乙卯明經薦舉鴻博杭大宗稱其研辨經史篤
學不倦北方學者未能或先爲錢文端所知任邱代東
邊鴻博詩邊生臥瀛海相賞抵璠璣好賣文園賦曾懷
光範書雨中行旆溼雲外幽人居執手終成阻何因一
起予己己以潛研經學薦之晚耽禪悅紀文達歲暮懷
人詩老狂邊季子壯志孤煙高得名三十載門戶猶蓬
蒿長嘯坐彈琴王侯不敢招想像敗絮中風雪空簞瓢

可以見其品概文達謂龐雪厓詩法律謹嚴情景融洽
優柔蘊藉得風人之旨北士之續其響者惟景州李露
園曹麗夫任邱邊隨園李廉衣獻縣戈芥舟數人則又
深許其詩也

敬亭曹維城鹿岡先生傳鹿岡歛人尊人官粵因籍番
禺少有詩畫名年二十五舉武榜會試落第黃軍門一
見薦之授宣武將軍參軍事嘗黑夜領步卒抵賊穴焚
燒九十九岡諸寨清遠龍門草寇悉平中丞法公撫粵
拉同巡視邊海置戍握險咸咨訪焉以母老歸養後欲
覽夷山諸勝因就八閩董統制幕詩學韓孟畫兼子久

仲珪之長丙辰鄂大司馬以鴻博薦不出時年已六十
三矣晚年名日盛四方游宦去粵以不得其書畫爲慙
日南諸國主亦航海致幣歲索不輟有王右丞詩箋杜
工部詩注畫史鹿岡集山笛二首云柳枝當風折還向
風中飛憶過洞庭水如臨黃鶴磯干盤龍飲澗六月雪
沾衣愁欲驅牛返山家半掩扉蒼蒼緱嶺月幽咽竟何
憑雪落天難曉風中人幾層能無存沒感恐有蛟龍乘
揮手謝黃鶴高峰立瘦藤秋蟲云除卻苦吟客荒荒莫
與偕未昏天已夢將曉地猶埋霜復幾時降月疑無處
佳神龍惟善變先自蟄江涯溪上云無事尋徐福神仙

止有閒偶然隨白鷺不覺傍青山水以天爲底雲因風
送還桃花與雞犬吾意非人閒樹根云候渡耦孤僧榕
陰曲岸崩虬拏波上下雲絡石稜層夢卽隨螻蟻光疑
射漆燈支離翻自愛從未中規繩

汪西顥以乾隆辛酉與萬循初吳文錫查儉堂脂車盤
山復作西山之游得詩爲盤西紀游集過陶元洞贈馬
鍊師云山勢隱奔峭不宜上宜下俄頃歷數峰一洞裂
巖罅廣深纔及仞紺閭冷無藉中有採芝侶高視九琳
舍生年誰滿百辛苦營臺榭轉燭難久居紛紛委灰化
至人識其故不樂尺椽架瑤房本虛無丹邱亦巧借惟

有厂下居仙驥可長跨碧雲寺云山坳日軌吐殘露滴

槐柳際曉度石橋穹構感摧朽寶旛蟲蝕餘畫壁塵封

久俯俯嘯雲亭幽篁更何有階列翠珉五大書耀巖藪

中憤媚閣作乃出宰輔手中二碑顧秉謙魏廣微撰文為魏忠賢立徒乞委

鬼憐詎免來者詬不如賣地券鏤詞無愧忸青鞵踏雪志碧雲寺

有小石幢刻元中丞阿里吉賣地券渡渾河望石景山云盧溝流太駛欲

渡愁無梁秋老野潦退量之一尺強車作牒子漾馬作

鳧翁翔失喜薊門路翻若雲水鄉舉首眺山麓浮圖接

青蒼迴颺起天半吹落替戾岡前年夏大水巨浪高岑

襄至今金閣寺龍象泣荒涼溯源自陰館淞灤鳴湯湯

嚙岸苦墊濡先時貴豫防堅瘦清瑩非徒爲模山範水者比也

沈學子探梅詩花光接日氣溶溶白雲生西灝極賞之題其詩冊云刻劃南枝又北枝曹家碑底鬪新詩花光日氣渾如接好句終歸沈亞之

葉丹秋林號梅花村農游黃山詩如觀音巖云巖前怪樹不知名巖下流泉暗送聲我欲汲來烹苦茗風吹松子打茶鏹蓮花峰云下臨無地上摩天一木橫空萬仞巔回首扶筇看過處此身今作小游仙抵家作云脫去棕鞵別故羣家人相問話紛紛解囊笑贈無他物一撮

香砂一縷雲均有新意明羅念菴祥符寺題壁云紫翠
林中便赤腳白龍潭上看青山藥爐丹井知何處三十
六峰煙月寒何年白日騎鸞鶴踏碎天都峰上雲欲起
軒轅問九鼎道衣重侍玉虛君後署南宮謫吏兼雲谷
樵夫見旌德方學成讀黃合志沈文愨謂葉已畦棲黃
山巔半載成記游十篇詩三十餘篇云終南太華匡廬
峨眉皆游屐所及各據其勝而未若黃山之奇疑天地
造物荒幻無有此理武工記王蘆人先生故里地名王
平先生名泰徵字嘉生明進士官禮部國初歸隱檀山
杜門教授每出游山水閒不攜僮從或一童子自隨或

數門生相扶掖惜不及見也

白近薇相國於康熙六十一年以兵尙協辦在陳文簡
尹文恪之前其別業在東便門外乾隆丁巳劉文定過
蓋平相國舊園云獨控閒園玉鼻騮邀牀寂寞古城窪
卽今白傅祠堂在無恙春風木筆花乙丑次韻宗室塞
曉亭閣學泛舟看白相國別墅牡丹之作云平泉又見
一枝新滿眼穠華暗損神絕少車鈿尋廢圃空餘蜂蝶
戀殘春采毫詞客休題葉白首園官故惱人試問木蘭
舟上望花身霞外重逡巡半篙綠水晚溟溟一簣青山
遠似屏當日賜金憑結構于今嘉樹亦飄零千夫驛致

人爭賞七寶闌成戶已扃東便門東遲去歸棹折枝猶

爲惜娉婷祇園夕磬散墟煙仕女春嬰尙逞妍幾度笙

歌行樂地百年風雨送花天爲憐老友親封殖不惜名

章寫靜娟一樣豐臺王相宅

宛平文貞公

翻階紅藥入時先

寒食辛夷似雪霏我來曾此對清暉留香幔捲金鈴亂

返照亭空玉笛飛欲覓新詞三調絕若論舊夢十年非

來春白社期相過細草茵成坐合圍文定於詩喜高青

邱謂能入唐人門闕代言應制研練工贍于文襄自以

爲不如在直次給札下筆極端謹點畫小不如意必再

三潤色乃已與彭羨門先後爲制科選首而久直禁廷

簡畀閣務尤儒生不世之殊遇也

董文敏爲陳仲醕作婉變草堂圖軸自題云丁酉十月
余自江右還訪仲醕於崑山讀書臺寫此爲別又云是
歲長至日仲醕攜過齋頭設色適得李營邱青綠煙巒
蕭寺圖及郭河陽谿山秋霽卷互相咄咄歎賞永日先
藏橫雲山人所又見墨緣彙觀後入 尙方 高宗御
題至二十二段田盤草堂面臨石城背枕雪瀑煙霞蒼
蔚之狀與泉石相問答爲山莊最佳處屋中適張是圖
因以婉變草堂名之有草堂婉變原如畫又得香光印
以圖之句劉繩菴田盤集婉變草堂恭和 聖製元韻

云卽景嘉名擅一堂嬉春花柳總丰昌詩維入聖斯堪
會畫不能禪豈漫張千漲遙青都借影四窗虛白獨生
涼如年長日娛三昔未覺郵籤置遞忙

翁朗夫賜書堂詩神韻清灑言盡意餘壻宮景初以其
不愛治生輒以晉人相況似頌亦似規也作此答之云
卜宅東田上幽偏得自頤貧思輸賦早老悔著書遲樂
令曾稱達羊公不樹私比蹤吾豈敢願學或能爲羊祜
女夫嘗勸祜有所營置不答退謂諸子曰樹私則背公
是大惑也運用極當情事年七十餘神明不衰鬢眉朗
暎雙頰猶頰竹杖方袍風致高簡爲文和平正大而自

伸其獨見謂武彝胡氏春秋傳以備經筵進講故閒附
會南宋時事而於論復讎事又不能激發高宗愧勵之
心如貶長勺之戰謂善師者不陣善陣者不戰之類義
例雖精於聖人之旨或未盡有當其說至允晚年歸隱
繪三十三峰草堂圖名流多題詠焉

尙茶洋以父滌浙江提督廕官戶部與厲樊榭最契送
樊榭罷鴻詞歸里云層城搗練北風微送別沙頭淚染
衣四野夕陽羣鳥散萬山秋草一人歸新霜已見鬢絲
改中歲徒傷心事違湖上舊廬終隱得嶼梅汀柳尙依
依高歌云孤帆秋色斷斜月夜光遲春日懷王羲叟云

日照雪中樹人居川上山野中云野人無瓦屋春色自
柴荆游西山集龍潭晚歸獨過香山寺云石苔人去積
山鳥客來驚獨游春水外笑入暮雲閒送循初還嘉興
云三徑綠苔人別後一江紅樹雁來時北山暮行云空
林古廟忽聞簫落日老僧忘打鐘皆見風調

閩縣郭復齋起元爲蔡梁邨高第梁邨佐春官方寢疾
以族人事牽連望吏議波及復齋復齋侃侃對簿賴以
白世宗特原文勤俾奉故職己未舉賢良官江南庚
午告歸自號羅山退叟胡稚威稱其文敘事理灼是非
適通變以其餘爲詩有清華之美所著介石堂集附水

鑑六卷指陳鑿鑿非抵掌空談者也

海昌吳榕園選浙西六家詩有厲無杭汪小米有絕句
云杭厲觥觥號兩雄晚年過嶺集尤工浙西詩派分明
在底事偏遺堇浦翁堇浦助舟焚券之事不一而足與
吳甌亭汪槐塘集武林遺詩百卷每人爲立小傳未刊
行善飲能盡宮僚雅集杯一套小米詩前杭後梁兩勅
敵以一合十傾醞酬梁謂諫菴

仁和許大綸初觀桃源山行云偶然籬落見雞豚野老
蒼顏笑語溫曲木支篷茅蓋屋不成亭榭不成村題畫
荷云柴門臨水藕花開鷗鷺低飛去復回記得山樓臥

銷夏破荷葉響雨聲來有清超拔俗之致其詩曰茶毘
臙橐金江聲謂昔天竺第九祖入滅諸弟子以梅檀香
屠維真體古人謂茶爲屠故梵云屠維卽華言茶毘蓋
取焚餘之意也同里黃琛爲貌鬢絲禪榻小身於卷端
了龍泓和其臥病韻云巷中福祐前身院來訪匏瓜老
病身榻踞維摩形影瘦龕因彌勒夢魂親伯鸞矯世甘
然竈子美違時欲避人早證詩禪無漏果何煩謝石指
前因注謂初觀先生語余曰偶問終身于折字家拈得
會字折者未析其義余自離合之恍然曰余其殆僧矣
乎今果然矣尾韻及之用存先生逸事云

吳蒙泉大令培源出杜雲川之門其詩細膩熨貼不墜
瓣香兼工填詞蝶戀花云燕子來時寒食近細雨斜風
隔斷春芳信薄霧寒煙飛不定畫橋何處桃花影正是
江郎詩思冷金鴨香消成就離人恨青鳥不來誰借問
柳陰溼處江南盡丁巳釋褐以教職用題甘懷園指頭
畫柳燕圖云曾趁東風到上林卻來南國舞春陰烏衣
巷口斜陽裏香徑落紅深未深感遇之作也丁卯入都
赴調奉發浙江自餘姚赴遂安留別句云幾度循行問
凋瘵鄉民傳說外公吳姚邑以愛民邑主爲外公亦可
見其治行

儀徵戴源鬯來再過河口云夕陽河口鷺拳沙村竈孤
煙冷暮鷗茅店酒香頻換主野梅樹老半無花山餘古
寺僧難住水破新坪路又斜下蜀街頭添小市遲子早
起喚歸槎所謂不事雕飾能得物情

秦澍豐司寇承蒼峴泉南之後經術篤行不僅以詩傳
而詩亦根柢深厚颯颯乎盛世之音題金慎齋東征贈
策圖云長白屹峙天之東三江倒瀉淩長虹神龍蟠鬱
億千載劃然草木開鴻濛真人出世壹區夏奠定鼇足
參元穹隆隆留都鍾王氣肇造遠邁鎬與豐大規明堂
列朝位卿曹左右分天工由來郎官應星象珪璋特達

著匪躬金君卓犖廊廟器四十縮綬馳花驄長城鉤連
鎖石棧鐵關突出當其衝前驅鱗鱗導征路賓從雜沓
塵夢夢清和月令紀首夏邊塞披拂餘春風天桃霏紅
莎草綠淨掃冰雪橫雲峰吏牘不煩官閣靜攤書說劍
娛心胸時登高山覽遼海襟帶鴨綠與混同三鎮鼎足
控馭遠眼界谿達侔長空水泉肥甘土脈厚匙有玉粲
蔬有菘黃羊紫駝白頭豕魴鯉腴膩貂蒙茸江南櫻筍
不足憶八珍饜飫霑兒童壯哉此行樂無極瓜期翻恐
成恩愬先生於我丈人行骨肉氣誼論深衷婁江蓉湖
片帆駛往來不倩孤飛鴻七年家山隔雲樹旅邸握手

欣重逢今朝客中復相送折柳欲贈心忡忡王生作圖
別思濃感我舒卷如旋蓬快聽殊績奏 法宮歸來鳳
闕陪雍容遲君醺醑儲三冬卻話元菟樂浪萬朶青芙
蓉

張息園有張三子之目謂孝子君子才子也乾隆己亥
由永甯道改刑部郎中未幾謝病歸癸卯卒年七十八
在都時以 御製詩倩和者甚眾一晝夜閒手腕欲脫
有捉刀可笑牀頭客六省三臺一手兼之句尹文端方
恪敏先後延幕府凡奏御詩文多出其手召試詞科賦
山雞舞鏡一聯云羽毛自覺奇難掩日月還欣近可攀

陳星齋亟賞之丁丑猶於酒閒口誦趙味辛年十四五
從塾師毛今吾游聞陳吉人盛稱息園之賢疑爲古人
及再聘張宜人則其同產妹也因依之以居其長妹爲
畢秋帆母太夫人秋帆將梓遺詩因循未果道光庚子
其曾孫鶴生太守錫蕃刻於廣州張南山跋謂屏旣敬
佩先生之賢又喜吾宗孝子之後有孝孫也

懷甯楊勤慤孫超恆以丁巳進士之令藁城勤慤有詩
云汝始分符去吾纔買棹歸縱然違祖膝猶喜近親闈
法立奸胥畏心清案牘稀此方經巨浸軫恤念民依勤
慤不許不阿三朝一節乾隆初以都憲乞歸卒年七十

有六乙丑沈椒園以奏事召對 高宗垂詢舉主以公
姓名奏 上亟稱老臣惜其殂謝者久之舉朝無不知
其清介也

乾隆初輪進經史講義諸臣進奏有識見拘墟者必從
容召對訓示紕繆者亦曲賜優容泰州程風沂京兆盛
修時官御史擬詠史樂府十二章恭進斷罟匡儆非時
也市價對遏淫刑也辟戟諍裁近倖也乘船戒勸持重
也撒屏悟防色荒也侍宴規抑華侈也從獵諷止游畋
也佳鷹表杜徵求也宮體箴黜浮靡也用筆喻端心術
也觀燈諫陳民瘼也三司告慮盛滿也 高宗以其指

事寓規詞意婉摯得獻納之意賞內用鞞二匹筆墨二種命桐城錢塘兩相國傳旨嘉獎焉風沂自訂夕陽書屋詩稿冠所進樂章于首

乾隆初蒙古有敖漢王儒雅頗讀書朝中稱爲敖漢先生張少儀八溝謠蘇垣蘿屋出書聲總角兒童讀日耕聞說經帷開毳帳爭呼敖漢作先生

鄭克柔悍吏詩縣官編丁著圖甲悍吏入村捉鵝鴨縣官養老賜帛肉悍吏沿村括稻穀豺狼到處無虛過不斷人喉抉人目長官好善民已愁况以不善司民牧藹如仁者之言姚石甫遣悶云水利農田本富民金錢搜

括亦艱辛諸君自急千秋業不計閩閩蹙類人八千矮
屋掄才地十道飛符下邑錢換取頭銜王刺史西湖閒
引木蘭船功名之士讀此能不汗下者幾人哉

長洲葉筠洲副使士寬康熙庚子舉人試取中書以知
縣用累官甯紹台道著浙東水利書乾隆丁卯以父喪
歸遂不出旣家居集諸生爲會課善假獎譽成其名不
取脩脯屋後分拙政園之半而爲園於園之隙地仿爲
號舍數十楹一晝夜爲七藝而評其甲乙豐其飲饌給
紙筆應府縣鄉會試必有驢送興起者甚眾有招張瘦
銅課於園中會者六七十人拔第一乙亥卒彭芝庭尙

書爲誌其墓徐良鄰哉書之瘦銅題副使遺像詩云臨
頓橋連北寺橫葉園花放樹藏鶯曾分筆硯嘗精饌也
抵黃壚萬古情風月書樓石屋邊公能未老卽歸田我
今白髮題公像已隔前塵三十年同里時多賢搢紳尙
書銘墓最情親重看太守銀鉤字秋雨殘碑盡故人其
汲汲引掖後進信士大夫所難能已

朱老匏生平所存詩二千有奇凡六冊其五冊盡燬於
蘭陵蕭生宅餘一冊又爲其婢藉鍼縷無復存者其友
人汪葍谿收集於野寺村店朋舊零楮廢墨中刻爲臥
秋草堂集一卷葍谿嘗與游揚州城西湖山閒披榛莽

歷墟冢藉草飲焉老匏漉然如寐率然如猱已而狂呼
孤笑旣又欷歔泣下不知其何爲也金山云兩昏攜酒
路星撒過江鐙廢寺云枯僧雙耳重衰草一腰深鐵佛
寺云鐵靈能化佛僧懶不聞鐘秋夜詠懷云野言多信
史長笑卽眞愁贈葑谿云入山求放士分飯與饑人題
汪巢林春深臥雨圖云關心事在閒中老彈指春從夢
裏深送楊已軍歸金陵云一笛離亭紅豆曲五更殘夢
白門山葑谿所謂千錯萬礮而出者也

葉河蘭汀佐領年十七舉康熙丙子鄉試官世蔭襲雲
騎尉與伊兼五爲中表解組家居藜杖野服放浪閒曠

口不言市朝事論文說史則四座風靡精悍之色時隱
隱眉睫閒丙辰病革屬兼五哀輯其詩刻於癸亥石臣
三十生日云照羽山雞每自珍冥冥鴻舉亦逢辰只教
無礙情皆適何必能飛意始伸可見其蘊蓄之深遠也
劉鳴玉劉文蔚姚大源沈翼天陳芝圖茅逸童鍾聯吟
倡和稱越中七子鳴玉字楓山翼天字雲鵬與二樹均
工畫雲鵬自題鄰翁驅鴨圖云模糊煙景米家山密樹
疏籬晝掩關一霎濯枝新雨過鄰翁催得鴨羣還同時
陳喬年自題其畫云愛絕溪山此結廬苔花青長屐痕
疏桐陰瑟瑟路幽絕夜靜月明人讀書均爲陶鳧亭所

稱

順德梁崇一司馬善長有廣東詩粹入存目後此温謙
山舍人有粵東詩海凌藥洲茂才有國朝嶺海詩鈔劉
樸石太史有嶺南羣雅伍紫垣有楚庭耆舊遺詩李子
敬廣文有柳堂詩錄廣南一代之詩略備矣崇一已未
進士少與莊滋圃相國同居粵秀書院分最深同登鄉
會榜莊以廷試擢第一崇一宰白水擢丞建甯莊方撫
閩崇一投刺闖入至屏後有操土音撫其背者
曰老崇來乎別十餘年鬚髮蒼矣蓋莊便服迎而字謂
之也

安東程爽林水南昆季有園在淮之珠湖爲前明張氏
曲江樓故址購而新之名曰柳衣亦名荻莊延致方文
輶蔣東委徐笠山王雲衢罕皆簞林及淮之周白民邱
庸謹劉萬資兄弟流連觴詠歷旬月無倦從子程茂萼
江厠其閒學日進方靈臯嘗袖其文誇示朝列屢躋場
屋築園曲江樓之南曰晚甘園種樹課書時人比之陶
峴倪高士王少林柳衣園詩紗籠題句記前游近水軒
窗事事幽踏月空林招舞鶴凌波一葦狎輕鷗頻邀杖
屨乘閒好小有湖山不外求想見勝槩嘉慶閒德清徐
大令振甲任清河壬戌春與含山王檢討勳輝臨汾王

待詔孫武桃源薛徵君懷安東程司馬易仿宋耆英故
事修禊荻莊漕使鐵梅菴作詩紀事書其詞刻石道光
辛卯徐公子竑補畫五老燕集圖而以梅菴墨蹟冠其
首徵題焉

如皋冒甚原上舍春榮每對客中味便思堂上餐之句
語極真摯所居云所居在窮巷寂寂不聞喧四顧但霜
葉含情無一言西風感遙夜有夢生邱園此際憶明發
歸期難遽論題崑山王學舒生田書屋云玉峰西去路
水竹選幽邨縣吏不到處漁船常在門檢書分甲乙侍
膳足雞豚眞朴原吾道何妨用拙存皆有唐賢三味集

意同時歎人汪頌就研客游東臬詩如對月云明月不
我棄對之如故人盈虧緣所遇澹嘿見其真孤影欲有
託寸心難具陳勞君共遙夜白首鑒清貧石壇煙月同
已軍香嚴家三兄葯溪云霜月忽生煙冥冥向客圓相
看殊昨日惜別又經年夜自浮光滿春能得氣先離憂
不可語惆悵石壇前詩格亦復相類

吳伯成大司馬有留村詞公子秉鈞字炎青有課鷓詞
一門羣從如秉仁慎菴攝閒詞棠楨伯憩鳳車詞翔華
趾美各擅所長均見聶晉人百名家詞中雪莊西湖漁
唱有舒雲亭題詞臺城路一首云西湖舊是銷金地斜

陽幾番吟徧長史新詞山人百詠點綴多開生面僑居
興遣話玉斧重來攜同雜犬一鳴雲深葛家山麓正疑
案閒中每消茗椀儘搜羅故跡牋注成卷喚艇邀涼凭
闌取醉只有老漁看慣霜紅近遠算此日尋幽秋光餘
晚莫道莊荒知君情未淺曩輯白山詞介時未之及異
日當補入

婁江胡栩然詩得力於婦翁王建初句如小橋人影移
春水高樹禽聲帶夕陽十里松聲不見寺四圍山色但
聞鐘夕陽鐘出雲邊寺春水船留江上山天邊春水半
帆去江上斜陽一笠歸泉聲夜作三更雨嵐氣寒生六

月秋雲連楚樹分山色秋滿章江帶月明疏雨忽來飛
白鷺亂雲乍起隔青山獨夜酒杯千里月半生詩卷一
扁舟王柳南稱其精刻跌宕盡態極妍卽此可知其造
詣弟雪林釋名眞靖主梅林東塢寺善繪事栩然題其
畫幅有數竿竹壓江水流一聲磬響楓葉落之句亦烏
可輩流也錢襟三得栩然兩樂府張燈設宴請定交壬
寅春栩然客吳門襟三寫圖爲贈有花滿橫塘路春風
那肯歸之句襟三卒栩然哭以詩有云殘梧衰柳落疏
疏涼夜驚心客外居夢去分明見顏色一簾曉月半牀
書秋梧撼撼落階除重入高齋痛有餘神秀二雛初上

學可憐六歲讀遺書栩栩然好交游往來悉豪士酬唱無
虛日自謂合伯鸞朱家爲一人見其婦王馥所爲事略
張世犖無夜題柳潔夫牧農圖云南山叩角是狂謀欲
賦歸田不自由五柳漫圖高士宅三農遙憶故山秋露
苗煙蕊瑯琊稻紅笛青蓑子母牛只有張顛耽麴蘖擬
將墨妙寫糟邱潔夫名溥錢唐副貢嘗在雲居寺之外
麓房講經授徒畋漁百家吳西林有柳下先生文字倚
頓之語有句云嫩筍山廚飯春茶古澗泉新削竹籤鋪
早稻深添芋火焙秋茶深領江湖晴雨之趣者也

唐俊公以雍正戊申佐年允恭督陶浮梁乾隆初權淮

八年移九江關仍管陶務嘗編陶冶圖說進呈李巨來
所謂斟酌華實有得於心而龍錫均窯追絕業復古制
翡翠玫瑰更出新奇者也有詩云慙愧甄陶漢使槎幾
番佳節在天涯西風一夜吹鄉夢寒雨連江溼桂花又
留別陶署詩云半野半官棲八載誰賓誰主寄孤情梁
闕燕壘分辛苦檻外花枝負約盟又云西江八載負黃
華淮海乘春又放槎又云古亭翠擷心裁句珠阜香留
手植花案朱笠亭陶說明初中官督造其後議裁用同
省府佐輪值又遠近不均移饒州府佐駐鎮專理而中
官借上供之名分外苛索隆慶五年都御史徐斌疏稱

內存運庫太監題奏缺少各樣瓷器要造裏外鮮紅盃
鍾甌并大小龍缸方盒共十萬五千七百七十其龍缸
體式底闊肚凸多致墜裂五彩缸樣重過大色多係驚
碎萬歷十一年工科都給事中王敬民題稱今據該監
所開盃碟鍾琖之類皆上用必需而祭器尤不可缺中
閒如圍碁碁盤碁罐無益之具屏風筆管餅罐盒鑪不
急之物總九萬六千有奇苛索如此俊公亦謂前明中
使督責甚峻窯民苦累 本朝康熙十九年遣內務官
駐廠監督向派饒屬夫役額徵悉罷之凡工匠物料動
支正項銷算公帑按工給值與市價均運器亦不預地

方一切不妨吏政官民稱便而物力優裕所造益精俊

公圖說曰采石製泥曰淘鍊泥土曰鍊灰配紬讀油去聲曰

製造匱鉢曰圓器修模曰圓器拉坯曰琢器做坯曰采

取青料曰揀取青料曰印坯乳料曰圓器青花曰製畫

琢器曰蘸紬吹紬曰錠坯窰足曰成坯入窰曰燒坯開

窰曰圓琢洋彩曰明鑪暗鑪曰束草裝桶曰祀神酬願

神童姓前明燒龍缸連歲不成神躍入窰突中以死窰

民祀焉 國朝順治十一年造龍缸欄版等器未成輒

止恐累民也亦仁暴殊政之一端矣

康熙初暹羅國遣使入貢使臣勅博瓦綈歸自京師至

南昌道卒瘞新建縣宮亭湖上新建樊惠我進士駿詩
占波勤貢使海外到中原故國迷歸道他鄉寄旅魂一
抔無樹表九字有詩存風雨湖亭夜青燐黯墓門乾隆
五十二年治中徐碧塘重修其墓賦詩弔之有展墓倡
和集當時朝貢之國如南掌自明永樂中刁線歹入貢
始置軍民宣慰使後不復至本朝雍正八年部長素馬
喇薩遣頭目叭猛花奉金表入貢貢道遼遠乾隆七年
定爲十年一貢 高宗八旬萬壽南掌國王召溫猛遣
陪臣叭整烘等賚蒲葉表文一道子象二虔申祝悃表
文云遣使叩慶伏願 大皇帝常調玉燭萬載清甯小

臣永荷渥澤云云緬甸有得楞普澗洞吾擺古等十種
轄境有銅壁鐵壁虎踞天馬等八關其地西至孟養北
至孟密分爨熒爲界三十一年新街受降各頭目遵制
薙髮 御製緬甸詩有最先乃新街歸附髮已薙句五
十三年恩准緬甸國長孟隕投誠納貢地產奇異花象
庚戌萬壽遣使呈進並萬萬壽佛經名坎扒窪表文云
願大皇帝壽如山海萬年吉慶云云至蒙古回部久同
隸屬朝鮮安南祿服有年更無論矣

六安夏之璜湘人以雍正庚戌課試受知盧澹園庚申
澹園以兩淮羨餘不充奉守臺之命湘人實從出塞孔

體仁爲作負笈圖高西園贈行詩云傳筆能投事更誇
烏孫相伴走天涯蘇門不少秦晁客只喫龍團餅子茶
有塞外橐中集四卷雷翠庭稱其論興和開平及河套
諸形勢皆闕安邊大計方南堂稱其塞外古意旅葵明
訓周家相天馬神歌漢武皇一聯直是義山蒙古語天
曰吞格利雪曰猜蘇雲曰沈阿勒雪後大風曰蘇羅罕
月曰擦拉星曰阿鐸山曰真烏藍山那邊曰阿倫嚟哪
路曰渣姆王子弟曰台吉男曰阿力女曰阿麥我曰魁
你曰問傲誰曰坑被睡曰穩坦笑曰惟伊輦叩頭曰木
勒格遠曰台和落黑曰哈喇走曰呀步駝曰鐵墨馬曰

抹黎牛曰烏喀辣胡羊曰哈泥山羊曰夜蟆官羊曰叔
叔羊羊尾爲烏义奶子曰和合油曰陶醪熬奶子皮曰
阿勒沫以馬乳蒸酒第二次曰阿勒占三次名阿勒喜
飯曰乞舖打持齋者名烏把什穹廬牆曰哈納馬鞭曰
塌沙兒湘人皆拈以爲詩記之鹽曰打木蘇有紅青白
三品用盛米織毛袋入澤底取之出水卽成結不煩煎
曬其值甚賤瀚海中有查克木本如紫薇梢如三春柳
堅沈似鐵作炭三兩日不滅俗以食犬爲大禁到門必
投鞭而入若攜進爲驚其祖先小兒初生時卽以木長
二三尺刻凹如盤中植一木以羊皮墊之置小兒其上

以毳交木加皮而縛之蓋教騎之意也

大名成北樵懷祖爲文穆來孫過村先生嗣子以辛酉
選貢判邠州修公劉墓建范文正祠權知三水有王三
子者以匹布聘司氏女有年矣李生復謀娶之王來訴
而李之媒張代李呈婚書且以女履爲答禮北樵知邠
俗不用婚書而履褻故諭司氏宜以原布還王司氏言
布久成衣願償其值北樵笑曰布卽古之儷皮純帛也
而柰何逐利以壞大倫於是李張皆語塞而王得直屢
報善最不上遷寄情吟詠自適其志其工詩固家學也
崔東壁爲其婿

文子侍郎比干墓詩馬鬣松楸合連山走大荒沙塵存
氣骨天地久低昂落日寒朱戶靈風冷桂漿不須傷彼
黍心可見成湯典重蒼老後來梧門自不能及潘四農
詩梧門瀟灑五言工王孟門庭結體中可以前修夢文
子銀潢屈曲涌天風初非故爲軒輊也梧門佳處文子
亦能爲之如雞鳴寺句云殘露滿空林鳥動時一墜何
減王孟錢東生詩才與劇堪夢文子少年死未入中書
鍊詩能淡方成古軒鶴雞羣盡不如自注謂侍郎年僅
三十五詩才至清人罕及者東生論詩絕句六十四首
有云尙書籌國鬢如霜境苦誰知對屬忙賴有蔣山袁

令在傾心肯拜味和堂

高文良公才力甚雄袁大令耆之吟誦嘗不去口

徐相

元

文鋒凌紫塞鄂公

爾

淵詠藹黃扉評詩推許稱同輩

落落關東老布衣

李鷹

評鶻極允其謂法庶子五言詩

冲淡有法多韋柳門庭語與潘說同

古人河則稱河海則稱海不相通後世多假借爲稱南方凡流水通呼爲河北方凡瀦水通呼爲海許晦堂出塞詩有水皆名海無山不倚天

武康陳虬善寫蘆雁朱鏞工潑墨山水徐回春畫蟹得青藤遺意時有陳雁徐蟹朱灰堆之諺徐雪廬詩陳虬蘆雁水雲灣徐蟹爬沙執穗還更憶湘南朱處士時添

辣蕪米家山蔡芝坪山人思銓隱居永安山下其沙寒
水碧山莊有山茶大竟數抱梅花百本春時看花者麇
至焉有前溪櫂歌八首云往事從頭話六朝至今風景
尙魂消滿隄絲柳垂垂綠猶向春風鬪舞腰前溪古渡
水潺湲流出輕紅片片鮮聞道漲痕高幾許羅裙長被
浪花濺森森兩岸竹陰濃撐入簰頭一綫通郎若步行
嫌赫熱同上簰上納涼風釣魚臺畔櫓輕挪放下長灘
疾似梭說與郎君須把穩防他水底石頭多家近溪南
淺水濱門前細浪似魚鱗無端竹筏牽連過攔任褰裳
欲渡人愛折山花插髻斜凌波綽約惱人懷雙趺不著

鷓頭襪別有尖尖筍籜鞵新筍穿泥嫩又甜薰籠夜焙
細添鹽客來多愛繡鞋樣恁及儂家尖上尖石城雲起
雨連宵春水新添綠半篙郎到溪邊來覓渡阿儂船泊
鼓兒橋前溪者古永安縣前之溪晉車騎將軍沈充家
此製有前溪曲宋少帝續之爲七首本南朝習樂地江
南聲伎多從此出唐崔顥詩所以有舞愛前溪妙之句
高東井有前溪後歌十首雪廬有前溪風土詞絕句百
首皆巴渝竹枝之遺山川古跡雖限方隅亦足備徵考
也

黃山開自唐永貞中前代普門禪師始誅茅闢徑故謝

公屐齒不到卽太白留宣城久下陵陽宿鰕湖去黃山
咫尺而未登送温處士歸白鵝峰詩有乘橋躡綵虹語
而丹崖天柱未見留題明趙仿因憐李白升絕頂空吟
齒蒼金芙蓉想像然也周迂村同沈歸愚自瀘安入歙
壤度石堪嶺浴湯泉發朱砂菴逕觀音巖登石人峰度
雲巢洞一線天憩文殊院登天都峰觀雲海經蓮華峰
麓至鼇魚洞宿獅子林望始信峰石筍矽憩雲外崢趾
至皮篷游雲谷過苦竹溪而還悉紀以詩乾隆丁卯江
穎長黃海游草則自江村取道豐口抵徑嶺登簪嶺出
天都保障關憩繼竹菴立天紳亭望苦竹溪飛瀑由致

兩亭過捨身崖至雲谷入九龍菴造皮篷至獅子林登
小清涼臺自始信峰至西海門坐光明頂入一線天自
喝石居詣文殊臺行文殊洞進雲巢洞抵慈光寺浴湯
泉而還迂村詩如人家雲嵐間朝夕對蒼巘月白多在
林崑深不聞犬突然陰洞中恍惚陷深井須臾從井出
冉冉首露頂爲歸愚所稱施竹田送黃西清之黃山句
云松聲喧萬壑雲氣流四時亦妙語也沈心齋謂黃山
松有四奇一不麗土二不甚高三有詰曲而無徑直四
枝節針毛皆偃如蓋平如茵就中最著者天門二株交
相揖讓曰迎送松鍊丹峰一株高僅二尺四圍廣蔭半

畝人跌坐其上曰蒲團松鰲魚背一株生地尺許爲巨石所壓復穿石而上石裹松無縫曰破石松一線天一株睡地丈餘忽伸枝直起曰臥龍松又如始信峰之接引散花塢之擾龍尤出人意想外若玉屏峰之覆鶴蓮花峰之娑羅龍翻石之盤虬始信峰下之仙人傘仙人碁皆神工鬼斧不可端倪錢虞山稱黃山以雲勝以泉勝以松勝品題最當然雲泉終古不改而松近遭樵火云云亦志名山者之一助也

朱筠園壬戌以異等生貢國學庚辰始爲德化學博癸未調鳳山鳳山西南有小琉球山突峙大海中間部疏

所云從興化東行六十里而遙至平海衛天清時隱隱
見小琉球者也成小琉球漫志十卷時臺灣道爲覺羅
四朗亭先生謙恭好士退食之暇留心詞賦創立海東
書院嘗召筠園闕歲試卷且聘掌教有知己之感宜亭
詩云坐鎮諸番靜孤亭愜所宜海光搖畫戟竹影漾浮
卮魏闕嘗鷹念林泉偶繫思風謠憑貢上甯減白狼詩
記厭承明直來東已六年英髦時接席宗室固多賢水
檻橋垂釣風亭午擘箋檳榔皆手植父老重流連宜亭
四公所建也公由中書出爲汀州同知擢守福甯調臺
灣陞分巡道道署有澄臺四望空闊海濤汨沒若在几

席斐亭在澄臺北宜亭在斐亭西旁植檳榔十數株月
夕風旦景物淒清灑然塵外甲申四公俸滿西渡筠園
作海東頌八章上之比諸雷陽陳清端清端觀察臺灣
時常巡淡水往復千四百餘里自持糗糒攜小帳房以
隨不入邸舍不受餽獻每食惟一飯一蔬或捐囊市酒
肉以犒徒御不設儀衛寥寥數人清端始任古田令筠
園在德化時同僚李陽光古田人年八十餘猶及見之
言公治縣時每日清晨門役剖龍眼七八顆以湯沃而
食之卽聽訟至暮其介節人人所知而腸胃之異亦天
特生之以相玉成云

筠園讀何江邨集云新詩零落委莓苔粒米胥從辛苦

來不見當年何水部猶傳疏箴絡黃梅

江邨句

何江邨梅

字雪芳康熙庚子自敘其詩引孫漑堂語凡人詩文譬

如舂米精糲不同要之皆是米粒粒從辛苦來何忍棄

之筠園取江邨詩鈔及李榮英萼侯白雲詩鈔其族父

朱肇璜待濱

佐亭詩鈔世父朱霞天錦曲廬詩鈔爲濰

溪四家詩建寧縣治濰溪之北也雪芳江邨漫興云曲

折連江岸荆扉傍水開短鏡劔紫筍疏箴絡黃梅隔竹

磬孤響抱琴人一來蕭蕭閒綠裏拂石坐莓苔得閒成

獨往郭外有林泉側帽穿花徑披衣撲柳絲叢殘餘酒

券折閱撰碑錢詩思何人其斜川與玉川歷歷水中石
粼粼溪上雲微雲澹欲起流水自成文入竹山相向迷
花路不分歸來衡宇下梧月正披紛源出宋人待濱詩
亦有寬閒俯仰之致天錦詩似香山劍南筠園所謂泳
沫靈府自出新意皆能不囿於土風者也

積善粹齋漢軍胡氏乙丑入詞館直講幄五年甲申二
月與羅旭莊同以講官授御史翁覃溪詩矐矐上觚稜
威鳳翮其羽請聽朝陽鳴不獨丹山舞峩峩雙鳧冠同
日登柏府先生登更速書名日纔五講官改諫官此事
舊罕覩其張氏四世講筵紀恩詩序云親炙聖學身依

訓命者文學侍從之臣惟日講官爲最切故事講官缺
自掌院學士兼充外則若詹事以下迄於編修檢討皆
得入選然有官歷坊局而不得一充講官者故仕宦以
詞臣爲榮而詞臣又以講官爲尤榮也

全椒吳靑然比部繁少卽工詩杭大宗謂其入晚唐之
室舉鴻博放歸後乙丑釋褐官西曹決獄能不阿大官
意詠懷句云致身有本末朱莠難苟圖突梯性不適那
敢輕賤軀可爲立身守官之法王蒼璧詩始進不以正
功業何足取君子慎自藏守身如處女亦至言也

松巖將軍福增格嘗於旅順搜得石刻云勅持節宣勞

靺鞨使鴻臚卿崔忻井兩口永永記驗開元二年五月
十八日三行廿九字以拓本貽錢坤一坤一謝其惠海
物句云井口銘貽是唐代扇頭蹟贈皆明人有酌雅齋
詩餘一卷刻於粵東蝶戀花西園送春云絮亂西園春
欲暮燕子呢喃愁絕雕梁訴醉眼勸春春不住朱門空
掩青苔路留春不見春何處春煞無情花也隨春去落
盡胭脂鶯不語綠楊枝上黃昏雨

秀水沈孝子敬懋貫籍順天爲諸生其父由延鄜綬道
被劾械繫皋蘭室家飄零閒關跋涉嘗有詩曰家室懸
三處秋風吹兩閒長安一片月天海萬重山又曰遙知

兩地高堂意縈繞燕雲又一周癸亥其父釋繫賜環乙丑母魯宜人病殂於輝縣之卓水莊遭火棺幾焚奮勇撲救火息而皮肉靡爛死年二十四錢文端沈孝子詩有云人生本係蟲母負而出齧三年始免懷辭乳逐飲啄異形而同根離裏爲骨肉嗚呼今之人各自保軀體踏火救母棺厥事真使獨

乾隆十一年勅令前代帝王陵寢及聖賢忠烈墳墓均修葺防護不載會典無陵戶者酌築圍牆以禁作踐十六年翠華南幸有詩云西山作記無多許說項還稱孝友堂孝友堂記宋紹興閒真西山爲項學士相暨弟

棟作也今嘉興長水塘西項家港發祥墓在焉嘉興祠
墓如岳忠武王祠明項襄毅公朱文恪公姚尙書公沈
少司馬公呂文愨公徐太僕公嘉慶初阮文達皆令有
司守護項氏復修孝友堂文達爲重題其額并復襄毅
舊宅爲祠舉行春秋官祭朱梓廬侯甯居詩府闢靈光
里堂仍孝友名誦勞衍先澤遺愛叶鄉評閱世邀

宸鑒巡方荷寵旌中丞來秉鉞直道主持衡廢墜修羣
祀彰瘴示庶氓紀其事也梓廬於岳祠紀之特詳其言
云忠武於孝宗陰有定策功否則充檜伎倆蓋張邦昌
劉豫之續也王孫鄴侯珂曾權嘉興府軍事兼內勸農

使子孫因家焉岳氏家譜王十八世孫元聲兄弟有遺
像記述宋孝宗於受禪初鑄王像以賜王子霖奉祀其
像銅身金裝朝衣冠手執圭圭鐫奉旨二字胸鐫盡忠
報國四字背中鐫紹興三十三年壬午秋七月樞密司
判樂則生造十九字背左右鐫唾手燕雲誓欲復讐而
報國矢心天地尙令稽首以稱藩二十二字卽王和戎
表中語也像側鐫子霖敬祀縣縣永傳八字並賜銅券
券辭有朕不遺終始之大義負卿盡死之完節二語又
賜銅冊文有子四孫二照序封官加祿永享血食廟貌
常新母朽朕意等語宋元易代閒遭亂畏禍奉王像券

冊并鄴侯所鑄鼎匱諸器藏諸暨山中金陀者本鄴侯
書名後人因以名其居故至元志有金陀坊之目其實
岳氏自琳避姓晦迹於禾迨明萬歷癸未元聲始舉進
士榜姓猶署樂至其弟和聲成進士乃於乙巳歲疏請
復姓元聲旋於丙午訪得像器故物遂建祠迎祀明末
祠毀像器皆被盜近有得其一爵送西湖祠者今祠乃
和聲六世孫恢復見辛未郡西岳祠落成詩注乾隆季
年忻州牧汪守愚刺史本直重修元遺山墓立祠訪其
裔孫主之復於墓旁建野史亭同時多有賦其事者何
蘭士詩一代典章誰信史中州壇坫此雄師浣花心事

坡翁筆不及成都有舊祠遺蹟重尋野史亭秀容城畔
草青青劇憐坏土餘荒壠特洗殘碑認舊銘亦盛德事
也

乾隆年一甲進士同爲六卿者惟乙丑武進錢文敏維
城莊方耕宗伯存與錢唐王文莊際華又皆直南書房
稱玉堂盛事蔣定翁癸未傳臚日公宴寶齋堂紀事句
云十年鼎足台司地還嗣錢唐座主音文莊時以少司
馬主是年禮闈也嘉慶癸酉鐵冶亭與座主王文僖同
官大宗伯而侍郎英煦齋胡西庚秀
楚翹汪瑟菴又皆治亭門人時有水部三堂三鼎甲春
官六座六師生之句三鼎甲者茹古香王勿菴及西庚
也

許晦堂輯同里人詩所標舉如王芬來素天空列宿轉
村曠微煙吹史克泰半農詠落花云蹋殘細雨橋邊路
載去斜陽渡口船納涼云薤簞有情生蝶夢火雲無隙
入松關皆見別裁又嘗評定朱翰宣王鴻宇陳源三家
詩刊版豫章馮柳東所標舉如王介人五言云江山開
一望吳越在孤舟秋高來馬健風急過鴻哀客鬢逢秋
換鄉心近暮愁蟬飛秋負葉螢座夜張燈江山雄白下
人物近黃初孤枕入山夢十年藏諫書微路暗通竹小
園全覆梅花浮三月雨春煖一溪雲寒牕燈照夕窮巷
草生春鬼受他年餒生當此世窮七言如秦塞忽驚三

月火漢家空待貳師功銅盤露下金人淚白木旗南赤
伏符片帆北去看秋水一雁南歸響夕雲野泥初拆未
開筍溪雨欲流將盡花秋山自響鐘才動風葉初飛樹
有聲草蟲怨溼啼初應接葉知寒墮早秋沈山子五言
如買魚橋外市踏藕鏡中船斷橋殘雨滴禿樹野鷗留
寺靜吠寒犬林深啼早鶯李岱補篁五言如老豈能忘
酒貧無可賣書家貧無好語米賤亦荒年薛魯哉五言
如天清孤鳥下日落大江陰天垂秋色外人坐雁聲中
斷煙微有色殘雨漸無聲周鳴盛桐北于忠肅云千秋
魂魄依孤冢一夕雲旂照九門朱賢爾菴和青邱梅花

詩半晴半雪閒三徑忽暖忽寒開一村灞岸曉風千里
雪石橋流水一枝春皆能各取所長不限以格狹廬專
室之士墨渝紙做之餘單詞逸句得以流落人間亦賢
者之用心也

漢陽孫楚池乙丑庶常改官部曹壬申分校得廬抱經
抱經督學湖南嘗寓書教以宜昌明理學母務華而棄
實解組歸閉戶讀書三十年不交當路詩如郊眺云大
別東收三澨水參河西抱九真煙丹楓楚橘逍遙地布
袴羊裘六七年故舊朝端幾人在詩書家學一經傳爲
耽野景娛閒眺鬢灑霜風雪滿顛清微淡遠可以想見

其人

桐鄉王御父客死天津御未知所在聞信徒步走三千里齧指出血徧覓於津城西荒塚閒竟得父骨負以歸查恂叔爲作王生吟云河邊白骨紛如雪河上旅魂泣霜月誰人半夜聲悲哀浙西王生尋父骨王生家在梧桐鄉團圞父子安耕桑父兮遠遊子在舍歷歷不復知存亡一旦客自津門至與父同遊鄉各異問父今年在何地謂父形骸空壟寄王生哽絕徐復蘇麻衣竹杖行崎嶇角飛城邊盡荒塚泣尋枯骨春模糊割兒指頭血滴親原上骨骨朽尚有苔血深光不滅千山萬水負骨

歸肌膚慘黑容顏摧兒呼兒哭父不應白楊風起聲淒
悲嗚呼漢王陵晉溫嶠伏劍絕裾慙不少何似王生負
骨返松楸寒食年年一祭掃

釋願來號損堂長于五言英夢堂相國爲之評定移菊
云故園秋草徧寒菊苦爲姿以此移相對因之感歲時
人能留晚節天不死霜枝多少東籬下爭開不自持閉
門云閉門常不出風雨過殘春萬事成孤立中年作老
人心隨流水淡日與白雲親大道高天在吾生甘隱淪
送人歸花橋云花橋歸隱處天與一柴荆流水發幽興
白雲生遠情製衣荷葉嫩午食荔枝明自古高人趣深

居不用名送友返高涼云十年不相見相見卽相離縱
有重來約殊非少壯時流雲多逐影落葉不歸枝又作
南飛雁青山何處期蟬云樹樹寒蟬噪空山最早聞秋
風一相送落葉自紛紛日月東西客乾坤一片雲人生
竟何尙不與爾爲羣道光閒滿洲文捷繙譯舉人削髮
天津城南大悲菴名聞法善填詞與梅樹君善重陽前
一日月夜聞雁云天邊初月挂冰痕老衲無求靜掩門
松影半簾侵草榻雁聲一一過蘆村卽事云預暖牀頭
酒半壺照人清影月輪孤傳神最是松窗上絕妙秋燈
補衲圖蓋亦有託而逃者也

錢唐僧篆玉讓山住南屏萬峰菴契原草堂與芡虛大
師同擅詩畫芡虛行腳入京直萬善殿賜紫歸主聖因
南巡賜詩有迎鑾應制之作而讓公掩關卻掃寄興
蕭寥朱青湖雪中懷南屏讓上人云楞嚴一卷與誰論
曉起圍爐宿火溫雪擁萬峰無客到石梅斜壓竹籬門
山窗開處失嵐光衲重天寒覺日長臨罷摩崖成半偈
蘆簾風颺煮茶香嘗於契原堂手植櫻桃一枝讓公茶
毗後青湖過此朱實纍纍感而成詠云吟客重來雪滿
顛櫻桃古幹尙依然紅株一樹垂垂處不見支公二十

年

長沙郭昆甫壽制府鄂公云赤子獨關慈母腹白頭今
見老臣心鄂濟文恭公鄂彌達雍正閒由曹郎授貴州
布政使宣力中外協贊綸扉素亭公子勒世馨例當得
官不願仕善畫不常畫畫輒數十幅維書亦然詩則日
吟一篇或數日吟亦止一篇衡山曠魯之嘗稱爲三絕
乾隆甲子文恭總督湖廣昆甫在其幕中長素亭一年
與陳希之奇聖朱升士展吳委長觀海及素亭約爲生
日凡月之某日當某所生之日則眾合錢壽當生者列
爲賓主賓具饌主人具酒饌不過四盞酒取盡醉而已
不及於亂坐以年次月週而復始爲之號曰借生日素

亭與陳四希之話舊云憶昔勞傾蓋君懷似水澄名花
三月酒細雨一窗燈載筆隨江漢同舟下廣陵今來皆
老大感慨亦何勝素亭爲昆甫作抱犢圖昆甫爲素亭
序其詩素亭以扇酬之復答一絕云儼然燕石換瓊瑤
搖蕩秋心暑頓除聞道百錢求六角須防人識右軍書
當日五人極相得也素亭以貴公子終於主事其雜感
云倦游殊覺晚舊迹已無餘貧士逢迎少閒來禮貌疏
典衾供客飯翦字課兒書風雨篝燈夜長吟賦子虛夜
半云落葉吟蛩不可聽塵勞一覺颯然醒浮名誤盡人
頭白壯氣銷來劍影青藤簟怯秋涼似水鏡花支夜暗

如螢悲歌自分成匏繫悔煞前生骨不靈

博爾濟吉特忠順公明安本兀魯特貝勒天命初率屬
來歸隸滿洲封二等伯子昂坤以功封二等男賜達爾
漢和碩齊號多爾濟以功封二等子納穆生格以前鋒
統領從征廈門陣歿謚直勇曾孫馬蘭泰襲伯以北路
軍營參贊大臣副將軍晉封一等恭誠侯時齋方伯國
棟虛宥府尹博卿額皆忠順公五世孫虛宥戊辰通籍
庚辰典試四川壬午復視蜀學戊子典試浙江詩才亮
特出自勳門其一門得易名者如內大臣鄂齊勒謚勤
恪杭州將軍扎穆揚謚敏恪大學士文孚謚文敬刑部

尙書阿勒清阿諡愨愨大學士琦善諡文勤禮部尙書
惠豐諡恭愨可謂鼎盛至文勤之孫恕齋而君子之澤
斬矣

始興林穆菴與朱梅崖礚礚同業古文盡讀宋五子書
性介而多恥見人時其心所可者與之言否則噤然朱
南厓好與之辨論不拒也以編修出守衢州三年不增
一衣左遷二秩例當引見以疾卒于京邸年三十五朱
碧峰作詩哀之云秉節三衢道東華謝早趨誰知河內
守原屬漢廷儒歷塊驥傷足驚縉鶴入笈淒涼謫官日
父老共嗟吁五嶺歸無日魂羈塞北陰斯人遽云沒大

造復何心永罷承明謁空成蒿里吟朱絃猶在御愁絕
爲知音

金山姚上舍惟邁配張孺人佛繡爲大木進士梁幼女
大木工琴佛繡因受數闕重華亭王孝簡永祺學嘗質
以詩有職思居草夏日池上云山光當晝寒竹色上衣
綠秋夜云拂榻清風興卷幔流螢入秋陰云山影輕於
畫溪聲寒入琴梅花云先教素雪傳芳信還倩寒流寫
倒枝似曾有約先春見祇自無言向我閒落花云人於
衰謝偏多感天與穠華豈有私詩境亦近大木卒年僅
三十三孝簡爲之傳

嘉興金樊圃廣文學超司鐸麗水時值大計上官欲劾其副誤填樊圃名樊圃默然以去朱介裴詩桃僵李代官何戀鶴瘦松清意卻舒懷樊圃作也

顧用方寓居海潮菴詩古寺空廊靜涼秋悵瑟居奚奴鋤徑草野客餽園蔬尋水朝看稻披帷夜讀書由來四方志隨處卽吾廬地僻人來少清秋客自吟將軍同逸興車馬到荒林廚冷茶煙細階空木葉深城隅三兩戶薄暮動疏碁又有萬事意何愜三更潮自生之句當是乾隆二年由蘇撫歸辦畿輔河隄時作前此以御史巡視長蘆鹽政以太常卿授直隸總河後此再任河道均

與詩中情境不類

陸宣公墓在忠州屏風山麓蘇州齊女門外雲和里亦相傳有公墓乾隆十六年奉 詔重修墓旁有古柏一

株中分四枝久已並枯至是北向一枝枯榦忽青森然茂密王岡齡爲甦叟太守寫圖裔孫陸闔庭作記一時題詠甚夥齊次風選刻成帙葉河厚菴尙書薩載詩云天上恩光及地靈還從畫裏睹儀型煙荒馬鬣悲陳迹日繞虬枝識幻形一代丹心能建白千秋鐵榦尙回青我來守土臨風弔珍重摩崖座右銘尙書伊爾根覺羅氏以翻譯舉人授鎮江理事同知擢守松江是詩蓋此

時作官至兩江總督諡誠恪雅頌集未錄其詩是圖後
歸鎮洋陸寄圃詩已失去重裝橫卷有阮芸臺題額寄
圃甥徐秋士詩君不見藍面奸邪君不怒楓江三尺崇
堂廡鬼庭宰木已成灰同是人間一抔土謂盧杞墓在
閩門外今打線巷是其墓道也後復藏青浦陸瑤圃三
味軒蔣霞竹嘗爲賦短古一章道光間從祀孔庭爲吳
梅梁所奏請亦多賦其事者

蕭休聖對遼興宗云臣惟知炒栗小者熟則大者必生
大者熟則小者必焦使大小均熟始爲盡美蓋嘗掌栗
園故託以諷諫祝趾堂詩所謂昔年讀遼史微物寓良

規蕭罕嘉努言可以家國爲者也陳寶所同周掌卿席
閒詠饒炒栗云爨煙生晚市侯栗味含真火速開絨易
飭香發罇新芋煨寒夜客椽拾古巢民我是蕭休聖能
知大小均他如榆耳磨云榆肉關門奪葷香一緘遠致
陋伊涼聽殘暮雨春苔老摘盡繁星夜色荒野衲肯來
同煮筍廚孃解事罷鳴薑養生方法從渠說放箸依然
覓睡鄉安肅菜云遂城菜把細香生旨畜空教疊翠罍
燕市雪深曾壓僮吳船飯熟又調羹每因去國思巢嗜
亦欲行園學宋耕三萬料錢何處乞年華漸看鬢絲莖
均極體物之妙二首皆與丁誠之吳船倡和之作王穀

原嘗讀之擊節者也其感舊句云天壤王郎愴舊情哦
詩病榻有餘清蠅朝蚤夕空成市圈鹿攔牛肯載名牙
曠之契正難多得

鐵嶺徐鏡堂文學壽保久寓津門以詩自娛客中書懷
云路轉川原曠斜陽散遠暉巖花隨意坼山蝶近人飛
景物塵懷遣向關客思違林秋成久別心憶故園檄

河內成文在中嘗從桑弢甫游辛未榜出檢討達麟圖
之門宰甘肅之高臺以罍誤羈留楊松門延課其子若
孫愛其詩庚辰爲題請復職挑發粵西權永甯牧卒官
有玉汝堂集詠史云蔡邕徙朔方爲徒將一載復忤中

常侍亡命走江海柯亭擗長笛意氣應無悔胡爲戀章
紱直作婢價買權門一廁足萬事隨瓦解拙哉王子師
遷怒身亦殆諸紀旣未成十志亦從毀始識申屠蟠逃
名眞蕭灑其座主爲劉文正文正以請棄巴里坤貽誤
僨事被逮過高臺共談至深夜無倦東行至豐樂鋪奉
旨以三品銜軍前効力復過縣境相謂曰一死一生乃
見交情吾與子可爲生死交矣秉此素心終當復觀天
日耳比復官之粵文正贈五十金以好爲官勿負夙心
相勛道義之交如此卽在中之爲人可見矣

吾鄉白莊恪河督鍾山署山東巡撫時疏言曲阜縣缺

向由衍聖公保舉每多瞻顧且邑中非其尊長卽係姍
姬牽制狎玩在所不免請改爲在外揀選調補不必拘
用孔氏族人下部議準司河最久 高宗南巡賜詩有
最爾平成績紆予宵旰籌之句孫豐字雪樵倜儻工畫
蘭官汾州通判景州張弼亭詩當年張緒風流甚白也
清標近似之五載榆關空雁影西窗翦燭是何時懷雪
樵作也

江夏劉允恭作六書世臣說六書者日知錄通雅歷法
天學會通方輿紀要歷算叢書也以地理沿革之書卷
表浩博乃規法皇輿全覽圖如其經緯縮於尺幅而以

歷代沿革各就一代制度分色別注古名于今界上爲
天下建置沿革圖考三十餘幅披閱方輿紀要凡十許
年愛其博辨而微疵其縱橫賞其考據而又準以時勢
作方輿紀要訂一百三十卷以列史天官地輿河渠水
利刑法食貨之屬一朝損益卽有一朝是非及修而成
書秉筆者用意不同又各視其學力淺深而書之詳略
是非乃芴如矣因爲折中考之成廿二史列志鉛關五
十卷胡維君爲作傳惜其書無傳乃條其篇目固江戴
之亞也道光中劉椒雲以好學稱同時人詩文集多見
其姓字允恭爲宣城弟子無稱焉故特著之

王含谿河帥歷宰山西之五臺榆次擢保德州與先高
祖侍郎公同官相善乾隆庚戌擢守潁州移楚州彭甘
亭客其幕爲仲子郊授經嘉慶丁巳再至潁州欲爲置
田以升授廣西左江道而罷甘亭是秋書寄五首云五
嶺高牙壓塞雄天書朝下騁花驄似聞蠻嶠需莊躋未
許淮陽臥汲公吉了嘒煙山似墨枕椰披雨路如弓離
懷也比牂牁水直送前旌象郡東拾徒山子占蠻荒豸
節昆侖拜武襄南郡好容人市幟西鄰須慎女爭桑歌
翻跳月詩逾麗樓拓籌邊鬢易霜珍重武溪鳶跼路尺
書勤與報沅湘丹徼迢遙溯隼旗從公虛擬傍駟駢直

愁梅瘴侵屨骨敢厭蘆花絮客衣八桂風回鄉信杳九
龍雲合使車稀飢鴻總有隨陽願遠到衡陽也倦飛鈴
齋契分數年年慙愧諸郎拜帳前不把軍書煩阮瑀直
將都講例彭宣風雲一別眞如雨萍梗三秋欲問天峴
首登臨尙垂憶也應回首向蠻煙萬里幃帷別緒新羌
邨歸守草堂貧更無嚴武能容我都恐宣明善傲人十
棧香霏霜後菊百觚狂落酒邊巾長飢差得閒居樂且
典秋衣買紫莼其與李石帆書云含谿先生振拔於垂
絕之時厚施於不報之域謬委授經課其仲嗣三年以
來送抱推襟有如一日其託分深矣含谿由廣右左官

旋復觀察廬鳳已未尹陪都庚申由河南布政使授河
東河道總督修築曹單隄工補修南旺湖濱隄堰以查
覈薪料過嚴河員造作浮言御史有風聞不確遽行入
告者 仁宗以所辦並無不合仍飭覈實以杜浮冒焉
壬戌卒於工次甘亭感舊詩云賤子甫冠時獲隨賓從
班論詩薄曹劉體道晞閔顏直從心地初了了呈倪端
業愧彭子佩行非曹景完猥於授經暇飽得餐微言道
義之交非同汎愛長子祁官河南知州次子郊安徽知
縣卽從甘亭受業者也

仁和葉函齋世度戊辰庶常癸未以陽春令被議來京

將有烏魯木齊之行得釋善山水松石日畫松於邸舍
既去自揭一小幘以從暇裝成軸繼宰黃梅復以註誤
落職朱美叔視學安徽壬辰九月遇於六安出以相視
爲和畫松舊韻云先生喜畫松外枯勢類柏中受天之
滋不入斧斤籍其年躬脫獄家事南北圻孤根雖輪囷
風噫縱橫擲先生意容容肯曰柏者迫癸未冬之初邸
壁畫水石十日得五松九九寒消厄母老詔許贖移居
面壁擇攜一小松行奇筆自憐惜天地縱我往不踟亦
不躋黃梅舊所治治縣挾髓液楚人失我公楚人得而
索惟公以厚失失一得者百迎我公教我陸離佩岸幘

講堂江漢上公來視如昔弟子侍有閒坐看畫幀尺曰
是松之精五百年成魄其精我畫取勞之以舊醪殞然
笑視畫目光瞭以碧吁嗟世閒事反覆松下奕觀柯爲
之爛豈獨蔽軒席先生庶幾松現松身指畫十載癸與
王朝濤響及夕月或來照之針針影露隙入畫無乃幻
先生留手澤吾昔視怱怱今遇情脈脈人生當樂死何
用憂歌奕留雨垂太陰有心者自白石君相國所稱盤
駢行空孤飛決背於此詩可得其概收處尤見道之言
其震山文氏祠句云不失其心謂之學可相參證章實
齋嘗謂美叔仲氏近佛季氏近神仙先生其折中於儒

學者乎世謂相國僧餐道服旁參導引之術搬運河車
簸弄精魄湯文端爲題其梅石觀生圖欲蓋彌彰文端
亦好道家言也美叔歸自安徽報石君詩諷其好異有
化緩人未可言靡之句其詩文筆其意所欲爲卷軸性
情無不曲赴腕下相國亦自謂不及也

美叔學士書法參通六書送錢獻之帖還嘉定卽題其
篆秋書屋圖云諸經疏釋要六書如子升堂兼入闕何
人目笑指六君自比窮奇與渾沌自注云時呼好爲六
書者翁覃谿戴東原陳竹厂王懷祖君及余爲六君蓋
嗤之也其送王懷祖云昔我謁文肅輿中英物暫抱持

出塞門解愛盤峰缺早知松柏根茯苓芽必中厥父典
三禮子實精其說乙酉子賜舉計偕歲丙戌任幼植主
我子來晤姚媿春試丑連卯屢深門外轍其子持酒尊
識子譚孔詡許君堂室奧表位施綿叢我南子留北辰
春罷去竭其年在太平冬杪子我愒開陬游橫雲岡脊
白龍龍華陽眞逸隱龍蟄穴泉列更觀互浮沈燭讀永
昌碣還登府子城游蹤唱曲折下有萬竿竹亂壓小山
雪我方敘說文資子口存舌辨體音必兼影響窮蚊蚋
聲五色亦五北鵝和南鷺要令江南士通經字爲揭春
試子暫歸夏息我逃熱子又渡江來兩箇軒坐設我承

四庫令網書廣張綬大集異等生館倚青山宿傳抄千
萬本唐禮子精閱晚暇入竹根削筍觸蝨蠹時交目飛
鴻戲奕取其拙數當風月清握手步高埒相眄七柏老
古影干干逝江山六朝州他時此憶絕燠寒幾何時我
冬使節撤諸生送江邊忽與采石別子待我邗溝蜀岡
梅蕾裂覆孟城角船載子朔風樵齊東竅正號趙北冰
已渴近臘稅轂下下榻子之媵掃滌椒風庭除啓碧桐
闌我甘歸識字理董仗子哲子言許氏書形意事契筋
假借古說精諧聲流弊劣川居卽中州山增或大喇依
聲心有羞托事禮司徹古今諧借殊始背終隔隴又有

轉注一考老訓互綴要之形聲訓六書密而警父子許
義昭兄弟徐音滅陽冰好大乖次立校徒列李燾韻補
五一亥部遭螫然死堂前灰伐餘漢初葉其閒小學家
注疏一一掇法當收散失非一手足烈書成曰攷異計
功竊稷禹我既奇子言鱗爪先漏泄半載卒二卷大樹
蠹敲鴛我亦時一鳴砌隙應蜻蚋飄飄玉堂夢送子風
雨颶閣技雖要賢名山業恐輟乙亥遷城西香爐巷斲
躡遲子三日見英華自愁癘矧茲萼鱸思歸飛快蟬蛻
良友之我遐臨歧心惓惓我有白玉瓚大酉治翹葉必
也六物兼我心醉口啜亦嘗采黃山嘉蔬取名釐何當

烹肥羶膏香奪蘅藹豈不嗜飲食不如子書牕乃知五
味成在瓠薦酒浼子別我我留書成我則悅我之思子
來成書子眞傑昔易詩書分文字百遺子諸師路塞茅
絕學誰探竈在禮敦贈處母曰懷安褻懷土豈曰宜君
子氣母茶今冬徂明秋兩九跳蹶踣良工治必爲子來
旦旦誓雖傷亦聚歡勿忘在執筆勸哉大其學世鼓傳
魯薛先生嘗言爲學必先識字刊布宋槧說文於安徽
時戴東原邵二雲及懷祖皆在幕府李畏吾謂懷祖避
禍天長聞先生能爲人排難解紛跋涉往見爲飛書當
路護持其家懷祖深明六書七音之旨時從問字質疑

未嘗以前輩禮貌自居自言吾以楷法效篆體非好奇
欲得古人製字意耳世之不明篆法而貌襲之者不免
蛟螭雜蠖蚓之謂矣何緩叟詩篆分行楷各門庭分楷
相兼豈典型固足爲近人下一鍼砭

黎城靳价人自縣歷州郡官畿輔最久所在多治蹟悃
愐儉素仕不怠學所著吳詩集覽王西莊比之定字之
注阮亭陸亞章謂嘗見錢圓沙手評吳詩汎及當時事
多靳注所未備者蓋价人未見此本也新保安爲沈青
霞謫佃處裔孫鬻祀田三頃方恪敏督直隸新其祠助
其裔孫婚受田者復以田歸之不受直价人詩云斗大

山城起暮霞，
蘇碑斑駁字生花。
鉛山墓舍今存否，
祠產千秋屬沈家。
水遠沙平古樹荒，
相逢樸陋半耕忙。
停車欲問當年事，
誰是先生弟子行。
其題燕子箋傳奇云：
仕局由來作戲場，
鮮于可作霍都梁。
南邦更有移天手，
少帝臨朝是福王。
狎客分箋鬪豔詞，
冰紈細字界烏絲。
君王且聽中興樂，
莫待阮中曲變時。
後庭玉樹已歌殘，
曲子先生死尙難。
誰向仙霞收骨肉，
投荒羨煞孔都官。
法曲淒涼燕語終，
石巢錦字委春風。
可憐玳瑁雕梁改，
青草山前喚介公。
綠溪詩筆亦自具，
體梅村

金壇蔡一帆明經咏句容唐潘王三烈婦詩三首其一

云句容有三烈所居皆南鄉地邇時亦近人口傳芬芳
豈鍾茅峰秀巋然鎮積綱前者爲唐氏歸於俞繼兆舉
止常端莊生平言笑少其夫遊京師婦養藉紡織繼姑
多詈言順受無怨色旣而夫客死聞赴欲隕身念有子
三歲苦守膺艱辛夜止晝則哭未嘗或見齒黽勉撫遺
孤成立謂可俟不圖至次歲其子戲池邊失足墮水死
傷哉母命連慟哭益無極親族相勸解愈勸哭愈哀號
慟終不改勸者至煩數停哭忽大笑時而開口嘻時作
莞爾貌眾謂成狂疾或疑有他心彼笑笑愈不止獨處聞
其音循至夫忌日延僧作佛事忽哭又忽笑眾莫解其

意豈知笑有由自笑得所歸兼笑猜疑者志識誠太微
是夜一聲寂明日門不啟眾爲推其門牀前自縊矣後
有潘與王相繼以烈起其二云忠臣非樂死時窮乃見
節烈女足自存何用自引決潘娥儒家女習禮不明詩
織作妙無匹窈窕有容儀十七入王門王性善妻室家靡不
宜孝養勤中饋敬戒慄無違娶婦得如此百年永賴之
詎料甫六載所天長別離慟哭感幽冥鬼神亦涕垂不
難卽同穴稟禮還自思叔幼舅姑老旦暮孰扶持妾旣
未生子血食將誰依且復忍須臾激烈非所期肝腸雖
寸裂歡顏侍庭幃婦道兼子職一身任艱危欲待叔成

立有子繼宗支卓哉冰霜操志苦彌可悲如何生不辰
骨肉起萌蘖披枝傷其心因以顯貞烈舅姑感其孝不
諒志所藏家貧年復少何以守空房欲從媒妁議再醮
適他方潘娥得聞之驚眩目無光驚定始自痛淚落不
成行舅姑應跋躓不得久扶將血食應斬絕不得冀延
長妾心則已盡命也何足傷始悔死不早前計空張皇
轉身入房中吞憤欲懸梁未知父意何終夜起徬徨昧
爽仍拭淚晨省到高堂潛聲語老婢爲我報耶孃待耶
久不至日昃猶相望哀哉不能言不畜我亦強明日告
老婢與我典衣裳爲我具酒食偕我至墓傍墓傍多野

草悲風何淒涼高哭復低哭伏地訴冥茫行者感太息
耕者亦情愴其墓有五塚纍纍自相當修有五烏至銜
將祭品嘗楮鏹懸墓門不火自灰揚奇節天示變感通
固難量婦慟氣屢絕翻身觸枯楊老婢急來救血淋頭
面創宛轉曳之歸入舍不復防前姑有栗主設位在南
廂稽顙告前姑家庭何不祥爾子既早歿爾媳亦卽亡
有志恨不遂心可對穹蒼闔戶爰自縊鍼綫密縫裳而
地擁敗絮一死何周詳人言死節難死節略較易潘娥
前不死慷慨有大志豈若匹夫諒一死不再計天也不
諒人捐軀復何悔今世讀書子忠孝口不置一朝臨大

節利趨害斯避何圖巾幗中有此丈夫氣傳與後世人
千秋植名義其三云慷慨赴死易從容就義難君子既
有然婦行更足觀江甯賢太守題贈王烈婦從容就義
字名實洵不負烈婦村家女夫爲戴可隆典商傭會計
家道本屢窮夫有姑王姥迎養視如姑旦暮作侶伴井
臼同拮据夫嘗多債負厥後忽得疾求醫終不痊問卜
竟少吉婦見勢不支因與夫計議盍以田與房了卻一
生累扶夫就几案授以筆與紙令其各分派不足聊復
爾夫留田三畝復存屋一間其餘及器物一一盡剖班
婦令夫讀聽怪爾何遺卻夫云爲爾計償債姑從略婦

言卽盡產償畢猶未可君又無兒女何乃慮及我夫忖
有異志含怒再改定投筆再噫嘻婦知若不聽詰朝具
蔬酒召各債主來眾人大歡喜如約各自回未幾夫命
亡勉治送終具聊哭不盡哀數日送歸墓卽將靈位焚
謂此誰奉祀且屋屬他人安能久留此鄉鄰見其事疑
訝各紛紜如謂有他志又未有他聞焚罷徹祭餘整爲
王姥饌拭几澣滌器旋檢鍼與綫脫白返青衣悄然久
人戶王姥至竈前見有賸鹽滷急入房中看安坐在牀
上尙云母且坐漸久無苦狀太守時行縣吏民報聞之
擘窠書大字題額旌戴祠聞者駱驛來爭欲仰貞烈面

貌儼如生衣裳密縫結眾爲營葬祭釀資易豐盈狸首
制七寸金粉題銘旌門前結素綵鼓樂聲喧闐宰羊及
雞犬馨香列滿前有爵盛冠帶庶人亦易服廬隘不容
人門外拜僕僕太守遣致祭官僚亦賁臨德貴爵以賤
叩首祈格歆眾爲來送葬冠蓋塞衢路旣封復再拜然
後各分去文人多題詠筆墨播芬芳榮哉烈婦名千秋
不可忘沈文懋極重此三詩明經所著律韻辨通詞式
精華段懋堂亦亟稱之弱冠時嘗從之游也

吾鄉張文和公第六女少許字安州陳方伯德榮之子
藩將及笄而藩死堅請歸陳氏至安州郭外從者請易

吉服入不可至門外哭而入屏居小室初至以稻米饋不肯食與家人同食梁粟安州去京師三百里其母思女甚趣歸甯曰兒非不念母也顧義不忍盧抱經爲撰事略稱其動中禮節又稱正紅旗滿洲官生誠保之妻名祥符夫病亟無舅姑子女誓以身殉及卒不哭不成服不翦髮言語動作如平時衣服盡以與人竟自縊死年僅二十後夫死二日以爲爲女而貞爲婦而烈彼皆有不可奪之志故貞者卒成其貞烈者卒成其烈士苟不立志尙奚可哉至伊嵩阿室希光夫病割股以療不驗誓以死從因女弱無依勉守志茹荼十年女嫁之次

日賦七言律二章見志自縊死其烈婦歎一篇蓋爲舒
文襄公兒婦棟鄂氏作也詩云殉夫慷慨女宗賢日下
芳名衆口傳我欲捐生猶未得羨君今已著先鞭夫君
寄託意殷勤忍死權留現在身傳語英魂休笑我須知
我亦後來人君子尤哀其志而健其決矣江陰繆晉申
浦如意簪歌題鈕祜祿氏節孝傳云春風吹羅幃良人
行役今且歸贈以如意簪插髻長願母相違秋雨淒復
惻良人一旦成永訣空存如意簪對之涕泗長嗚咽自
從初結褵敬愛兩不疑詩書喁喁誦閨閣朝夕討論忘
寒飢嗚呼好事多磨錯自古紅顏皆命薄良人遭重疾

親身侍湯藥侍湯藥百計窮刳股願得精誠通誰知通
眉郎能作玉樓賦死者不可生生者將安附此時淚滴
羅衫紅恨不地下相追從卻憐弟妹與兩女年幼未免
孤煢煢爲夫忍死十餘載泉下知夫久相待待得諸孤
婚嫁成從容就死夫何悔遺書何諄諄題壁明苦辛戴
此如意簪用慰泉下人亦乾隆間人也蒙古人國裕光
緒癸未進士以瘵卒年未三十妻翁氏殉焉仲淵修撰
女也以烈婦旌表埶記於此

圖研齋觀察兵阿宰新會八年陳天石孝廉家麟暨從
子諸生文藻皆出其門研齋歷廣州府惠潮嘉道以乾

隆乙酉旋里久不相聞文藻感念知己形諸夢寐有詩
云東甯圖夫子接見恆刮目大阮及阿咸謂可光宗族
沒者委蓬蒿存者徒刺促漚江路阻修紛紛何蕉鹿恍
惚平生歡師友情敦篤噩夢不少延荒雞聲喔喔非研
齋好士亦安能得此哉

雪橋詩話餘集卷第四